




Zangc Ziouv nduqc dauh hnangv

**Porv Mengh Mienh:
Zeuz, Yauzsing**



Domh Hoc Dauh: Ziepc Diuh Leiz-Latc: Cuotv I^yipv 20:1-17

Doqc Ging-Sou: “Tin-Hungh gorngv naaiv deix yietc zungv waac. Yie se Ziouv, Meih mbuo nyei Tin-Hungh, dongh dorh meih mbuo cuotv I^yipv Deic-Bung zuqc zoux nouh nyei deic-bung wuov dauh.” (Cuotv I^yipv 20:1-2)

1. Cuotv Liuz yie, maiv dungx zangc ganh dauh Zienh.
2. Maiv dungx weic ganh zoux haaix nyungc miuc-fangx.
3. Maiv dungx la'guaiah longc Ziouv meih mbuo Tin-Hungh nyei mbuox.
4. Oix zuqc jangx jienv longc Dingh Gong Hnoi benx norm cing-nzengc hnoi.
5. Oix zuqc tongx nimc meih mbuo nyei diex maac
6. Maiv dungx daix mienh.
7. Maiv dungx hienx auv hienx nqox.
8. Maiv dungx zoux zaqc.
9. Maiv dungx zoux jaav zornng-zengx hoic mienh.
10. Maiv dungx mueic jieqv mienh nyei jaa'dingh.

Ziepc diuh leiz-latc se maaih camv norm mbuox, Yiem Cuotv I^yipv 24:12, heuc la'bieiv-benv nyei leiz latc. Yiem Cuotv I^yipv 34:28: ngaengc waac; ziepc diuc leiz-latc fiev jienv i kuaaiv la'bieiv-benv. Yiem Nzamc Leiz-Latc 9:9, Ziouv caux liepc nyei ngaengc waac. Nzamc Leiz-Latc 4:13, I kuaiv la'bieiv-benv. Nzamc Leiz-Latc 9:10,17, yiem (Cuotv I^yipv 16:34); (Cuotv I^yipv 25:16), laengz nyei ngaengc waac. (Cuotv I^yipv 31:18). Yiem siang-ging-Sou, m'daaiah heuc leiz-latc (Matv^tai 19:17).

Gorngv Jiez Gorn Nyei Waac:

Yiem Siang-Ngaengc Waac, Yesu zorqv naaiv deix ziepc diuh lingc bun nqoi zoux I diuh, “*Oix zuqc longc nzengc hnyouv, longc nzengc za'eix, longc nzengc cong-mengh hnamv Ziouv, meih nyei Tin-Hungh. Naaiv se hlo jiex gauh longc jienv jiex nyei leiz aqv. Da'nyeic diuh yaac fih hnavg nyei, oix zuqc hnamv mienh hangv hnamv ganh nor. Mose nyei leiz-latc caux zuangx douc waac mienh njaaux nyei yietc zungv longc naaiv deix i diuh leiz zoux gorn.*” (Matv^tai 22:37-40)

Mbuo hiuv duqv yiem Siang-Ngaengc waac, Leiz-latc biux mengh baamh mienh zuqc Tin-Hungh siemv zuiz (**Lomaa 3:19**), Maiv maaih haaix dauh haih ei jienv leiz-latc zoux haih duqv caux Tin-Hungh horpc hnyouv, leiz latc kungx bun mienh hiuv duqv ganh maaih zuiz hnavg. (**Lomaa 3:20**). Leiz latc nyei za'eix se gunv jienv mbuo taux Giduc daaih wuov zanc, weic bun mienh sienx Giduc duqv caux Tin-Hungh horpc hnyouv. Ih zanc sienx Giduc nyei ziangh hoc taux, mbuo maiv zuqc leiz-latc gunv aqv (Gaa^laa^tia.3:21-24). Ih zanc mbuo duqv njoux weic Tin-Hungh nyei EN. (**Gaa^laa^tie 5:2; 6:14-15; 1 Bide 3:18**).

Weic mbuo maiv zuqc leiz latc gunv nor, mbuo maiv zuqc ei leiz-latc fai? Yiem **Lomaa 6:14-15** gorngv, “zuiz maiv duqv zoux ziouv aengx gunv meih mbuo, weic zuqc meih mbuo maiv yiem leiz-latc ga'ndiev. Meih mbuo yiem Tin-Hungh nyei en ga'ndiev. 15 Wuov nyungc, hnavg haaix nor zoux? Mbuo maiv zeiz yiem leiz-latc ga'ndiev, se yiem Tin-Hungh nyei en ga'ndiev. **Hnavg naaic, sueih mbuo baamz zuiz fai? Zungv maiv zeiz!** Maaih deix mienh sienx liuz Yesu, laic duqv maiv zuqc muangz Tin-Hungh nyei leiz-latc mv bei. Yesu ganh gorngv, “*maiv dungx hnamv yie daaih guangc Mose*

nyei Leiz-latc caux Tin-Hungh nyei Douc Waac Mienh njaaux nyei waac. Yie maiv zeiz daaih guangc. Yie daaih weic bun yietc zungv cuotv daaih zien..” (Matv[^]tai 5:17-18) Leiz-latc biux mengh mbuox mbuo gorngv mbuo ganh maiv haih caux ninh zoux horpc. (Lomaa 8:1-4)

“Douc-douc Ging-Sou, Tin-Hungh dorh mienh fiev yaac maaih lamh longc weic njaaux mienh, weic gorngv-hemx mienh, weic zorc mienh zoux dorngc nyei dorngx, weic njaaux mienh zoux horpc nyei jauv. (2 Ti[^]mo[^]tai 3:16) Douc-douc se maaih eix-leiz gorngv ziepc diuh leiz-latc caux jienv. Se gorngv mbuo longc duqv horpc yaac bieqc hnyouv nor. Naaiv deix leiz gengh bungx nqoi mbuo nyei maengc weic mbuo hiuv duqv zien leiz.

Weic haaix nyungc Tin-Hungh bun Leiz-latc?

- Leiz-latc dorh I[^]saa[^]laa[^]en mienh haih zoux gan Ziouv, zoux horpc, zoux cing-nzengc.
- Yiem Leiz-latc, mienh haih buatec Tin-Hungh nyei fiem-fingx, caux ninh nyei za'eix bun taux ninh nyei mienh gorngv hngangv haaix nor yiem.
- Leiz-latc dorh mienh hngangv haaix nor lanh caux lanh haih horpc.

Mbuo oix zuqc jangx jienv, I[^]saa[^]laa[^]en mienh coqv hoqc cuotv I[^]yipv deic-bung daaih duqv mbuo hlaax nyiec hngangv. Yiem I[^]Yipv deic bung mienh zangc ziex nyungc zienh. Ninh mbuo sienx yietc nyungc zienh maaih yietc nyungc nyei tengx, jaa sienx camv nyungc zienh jaa laic duqv jaa duqv fuqv camv. Weic I[^]yipv mienh zangc ziex nyungc zienh, yiem Tin-Hungh dingc nyei nyungc-nyungc ninh dingc taux ninh mbuo zangc nyei: ninh mbuo zangc ndoqv, Tin-Hungh bun ndoqv benx nziaamv, ninh mbuo zangc mba'hnoi, Tin-Hungh bun mba'hnoi hmuangx mingh, ninh mbuo zangc dorn la'gauv, Tin-Hungh bun ninh mbuo nyei dorn la'gauv daic (Cuotv[^]i[^]yipv 9-12).

Weic haaix nyungc Tin-Hungh oix zuqc mbuox I[^]saa[^]laa[^]en mienh taux pou-tong nyei leiz gorngv “cuotv liuz ninh maiv dungx zangc ganh dauh”? Weic zuqc 400 hnyangx nyei ziangh hoc, I[^]saa[^]laa[^]en mienh zuqc I[^]yipv mienh gunv, hoic, maiv buatec Tin-Hungh zoux nyei gong. Ninh mbuo yiem wuov lauh nyei yaac jiex gorn zuotc I[^]yipv mienh nyei fiem-fingx caux zangc nyei. Maiv gunv ninh mbuo hiuv duqv Tin-Hungh nyei mbuox mv baac ninh mbuo maiv hiuv ninh.

Se gorngv Tin-Hungh heuc ninh mbuo zangc ninh, se hungh heic nyei bun ninh mbuo, ninh mbuo zorqv Tin-Hungh zorpc jienv wuov deic zienh zangc duqv mi'aqv. **Mv baac** Tin-Hungh gorngv “*cuotv liuz yie maiv dungx zangc ganh dauh zienh.*” Naaiv se aqc nyei bun ninh mbuo. Se gorngv ninh mbuo maiv sienx Tin-Hungh dongh dorh ninh mbuo cuotv I[^]yipv wuov dauh se zien wuov dauh nor, gengh aqc duqv bun ninh mbuo ei wuov deix nduoh diuh lingsh.

Ih jaax hnoi, mbuo haih bun ziex nyungc daaih zoux ziouv gunv mbuo nyei maengc, benx zienh yiem mbuo nyei maengc. Nyungc zeiv se: Nyaanh, mengh dauh, gong, naauc ngite aengx maaih camv nyungc nyei. Maiv maaih haaix dauh gorngv “yie oix bun naaiv deix ga'naaiv zoux zienh gunv yie”, mv baac ninh mbuo haih benx ziouv fai zienh gunv weic ninh mbuo gunv mbuo hnamv nyei, gunv mbuo zoux nyei, yaac zorqv nzengc mbuo nyei ziangh hoc. **HAAIX NYUNGC BUN MBUO CAUX TIN-HUNGH NQAEQV JIENV SE BENX ZIENH YIEM MBUO NYEI MAENGC.**

1. Hoc-Dauh: Zangc Ziouv nduqc dauh hnangv Da'yietv Diuh Lingc

Doqc Nyei Ging-Sou: “CUOTV LIUZ YIE MEIH MAIV DUNGX ZANGC GANH DAUH ZIENH” (Cuotv[^]i[^]yipv 20:3)

Gorngv Jiex Gorn Nyei Waac: Lingc Nyei eix-leiz se

1. Maiv bun sienx zorpc, fai sienx camv-nyungc zienh.
2. Maiv bun sienx zienh, kungx sienx Ye[^]ho[^]waa hnangv.
3. Maiv bun haaix nyungc daaih nqaev jienv Tin-Hungh caux sienx ninh nyei mienh.
4. Maiv bun maaih ga'naaiv zienh caux ninh nzaeng.
5. Tin-Hungh se lengc jeiv nyei, zienh maiv maaih dornxg yiem Tin-Hungh nyei nza'hmien fai yiem sienx ninh nyei mienh nyei maengc.

Porv mengh Ging-Sou :

1. Maaih jiu-tong liuz cingx maaih leiz latc.

Cuotv[^]i[^]yipv 19:4 - 6. 'Meih mbuo ganh buac yie hnangv haaix nor zoux bun I'yipv Mienh. Yaac hiuv duqv yie hnangv haaix nor dorh meih mbuo daaih taux yie naaiv, se hnangv domh jaangv zorqv dorn an jienv ndaatv gu'nguaaic ndaix nor. 5 Se gorngv meih mbuo muangx yie nyei waac yaac ei jienv yie nyei ngaengc waac zoux, meih mbuo ziouc benx yie yiem maanc fingx mbu'ndongx ginv daaih nyei mienh. Naaiv lungh ndiev yietc zungv se yie nyei. 6 Meih mbuo oix zoux yietc fingx sai mienh fuh sux yie, yaac benx yie nyei cing-nzengc fingx.' Naaiv deix waac meih oix zuqc gorngv mbuox I[^]saa[^]laa[^]en Mienh."

Laengz ngaengc waac zuqc maaih i dauh fai i guan: Tin-Hungh caux ninh nyei mienh. Weic haaix nyungc mbuo zuqc muangx ninh nyei waac? Dau nyei waac yiem 19:5-6: Weic mbuo se Tin-Hungh nyei mienh. Tin-Hungh nyei mienh oix zuqc muangx ninh nyei waac. Weic naaiv maiv zeiz ninh nyei mienh cingx maiv muangx ninh nyei waac. Mbuo maiv nimc ga'naaiv weic Tin-Hungh gorngv “maiv dungx zoux zaqc” maiv zeiz gorngv weic mbuo gamh nziex mienh zorqv zuqc mbuo. Mbuo maiv hienx auv hienx ngox weic Tin-Hungh gorngv “maiv dungx hienx auv hienx nqox.” Maiv zeiz weic nzauh mienh buac. Ziepc diuh lingh nyei hatc maaz se maiv daan gorngv naaiv se fiev daaih nyei leiz mv baac naaiv deix leiz gorngv taux caux Tin-Hungh nyei mienh hnangv haaix nor caux Tin-Hungh jiu tong caux Tin-Hungh horpc hnyouv nyei mienh. Naaiv deix lingc biux mengh gorngv taux jiu tong caux Zangc Diex.

2. Ei leiz-latc biux mengh mbuo zieqv duqv Tin-Hungh nyei EN zingh.

Mangc Cuotv[^]i[^]yipv 20:2, "Yie se Ziouv, meih mbuo nyei Tin-Hungh, dongh dorh meih mbuo cuotv I'yipv deic bung zuqc zoux nouh nyei deic-bung wuov dauh."

Ndangc Tin-Hungh heuc I[^]saa[^]laa[^]en mienh ei ninh nyei lingc, Ninh njoux I[^]saa[^]laa[^]en mienh. Mose maiv zeiz mingh taux I'yipv deic-bung dorh jienv lingc taux wuov gorngv,

“se gorngv meih mbuo muangx naaiv deix lingc nor... Tin-Hungh oix njoux meih mbuo cuotv I^yipv.” Mv baac Mose mingh taux I^yipv, ninh gorngv “Tin-Hungh haiz meih mbuo nyiemv, ninh fungx yie daaih njoux meih mbuo.” Tin-Hungh dorh I^saa^en cuotv I^yipv daaih ninh cingx bun lingc I^saa^laa^en mienh, eix-leiz se gorngv, weic Tin-Hungh njoux meih mbuo cuotv daaih, meih mbuo horpc zuqc hnanv naaiv nor zoux, hnanv naaiv nor biux mengh meih mbuo zieqv duqv ninh nyei hnamv caux hatc maaz.

19:4-5 Meih mbuo ganh buatc yie hnanv haaix nor zoux bun I^yipv Mienh. Yaac hiuv duqv yie hnanv haaix nor dorh meih mbuo daaih taux yie naaiv, se hnanv domh jaangv zorqv dorn an jienv ndaatv gu'nguaaic ndaix nor. 5 Se gorngv meih mbuo muangx yie nyei waac yaac ei jienv yie nyei ngaengc waac zoux, meih mbuo ziouc benx yie yiem maanc fingx mbu'ndongx ginv daaih nyei mienh. Naaiv lungh ndiev yietc zungv se yie nyei Da'yietv, njoux ndangc...cingx bun lingc caux leiz:

Maaih mienh gorngv mbuo yiem en nyei ga'ndiev maiv zeiz leiz, mbuo duqv njoux weic Tin-Hungh nyei en. Maiv zuqc ei leiz fai hoqc taux leiz nyei jauv. Baulo gorngv, leiz se longx nyei, leiz maiv haih njoux mbuo mv baac haih mbuox mbuo gorngv duqv njoux nyei mienh oix zuqc hnanv haaix nor hiuv duqv Tin-Hungh nyei en-zingh. Hiuv en-zingh nyei mienh maiv zoux doix-dekc bun en wuov dauh.

3. Leiz-latc bun qiangx sienx Yesu (mienh mangc maiv buatc) nyei mienh haih zoux ei weic biux mengh ninh mbuo sienx nyei (mienh mangc duqv buatc).

Se gorngv meih naaic mienh... “Meih mbuo sienx Yesu nyei?” Maaih camv gorngv “Sienx nyei!” Mv baac leiz-latc tengx biux mengh gorngv mienh gengh sienx fai maiv sienx...mangc gaax ninh mbuo nyei maengc doix-diuc Ging-sou njaaux nyei leiz nyei fai. Gorngv sienx Yesu nyei se hungh heic gorngv nyei, zoux ei se biux mengh gengh sienx fai maiv sienx.

Nyungc zeiv, meih haih gorngv mbuox meih nyei auv, nqox, fai fu'jueiv “yie hnamv meih nyei” mv baac zoux nyei doic-dekc meih gorngv nyei fungc haih biux mengh gorngv meih hnamv fai meih gorngv nyei se zien. Leiz-latc bun sienx nyei mienh haih biux mengh ninh mbuo sienx nyei, weic zuqc ninh mbuo ei jienv leiz-latc zoux.

Zien-zien nor naaiv deix ziepc diuh lingh naaic ziepc joux waac mbuo. “Meih taaih haaix nyungc gauh hlo jiex zien Ziouv nyei fai? **Maaih haaix nyungc yiem maengc meih dorh daaih longc zoux gauh jienv jiex Tin-Hungh nyei fai?** Meih la'guaih longc Ziouv nyei mbuox nyei fai? **Meih zoux nyei gong gauh jienv Tin-Hungh fai?** Meih tongx nimc meih nyei diex maac nyei fai? **Meih hiuv duqv mienh nyei maengc se jaix nyei fai?** Meih ziepc zuoqv bun meih nyei auv/nqox nyei fai? **Meih zieqv duqv mienh maaih nyei se mienh nyei, maiv zeiz meih nyei fai?** Meih gorngv nyei waac zien nyei fai? **Meih mueic jieqv mienh nyei ga'naaiv nyei fai; fai meih a'hneiv Tin-Hungh bun ganh dauh maaih dongh ninh mbuo maaih nyei?** Mbuo hnanv haaix nor dau naaiv deix waac biux mengh mbuo hnanv haaix nor caux Tin-Hungh jiu tong, mbuo hnanv haaix nor sienx.

4. Leiz-late se mbuox mbuo hnavg haaix nor zoux horpc Tin-hung h yaac caux duqv mienh njiec.

Da'yietv diuh lingc mingh taux da'feix wuov diuh lingc mbuox mbuo hnavg haaix nor caux Tin-Hung h jiu tong. Da'hmv mingh taux da'ziepc gorngv mbuox mbuo hnavg haaix nor caux mienh jiu tong. Yiem Maako sou 12:29-31 Yesu nzutv zunv ziepc diuh lingc gorngv "*Yesu dau, "Gauh longc jienv jiex nyei leiz se dongh naaiv. 'I^saa^laa^en Mienh aac, muangx longx oc. Mbuo nyei Ziouv, Tin-Hung h, se nduqc dauh Ziouv hnavg. 30 Yaac oix zuqc longc nzengc hnyouv, longc nzengc za'eix, longc nzengc cong-mengh, yaac longc nzengc qaqv hnamv Ziouv meih nyei Tin-Hung h.'* 31 Da'nyeic diuh longc jienv jiex nyei leiz yaac dongh naaiv, '*Oix zuqc hnamv mienh hnavg hnamv ganh nor.'* Maiv maaih haaix diuh leiz gauh longc jienv jiex naaiv deix i diuh aqv."

Ih jaax hnoi nyei mienh camv oix "maiv dungx daix mienh, maiv dungx zoux zaqc, maiv dungx hienx mienh nyei auv/nqox, tongx nimc diex maac", maiv maaih haaix dauh maiv oix naaiv deix lingc, mv baac bun mienh maaih sic se da'yietv wuov diuh lingc: *Maiv dungx zangc ganh dauh zienh, kungx zangc Ziouv ganh hnavg.* Lengc jeiv nyei mbuo iu-mienh camv nyei sienx zorpc, Tin-Hung h maiv bun sienx zorpc, sienx camv-nyungc zienh. Maiv bun sienx zienh, kungx sienx Ye^ho^waa hnavg. Maiv bun haaix nyungc daaih nqaev jienv Tin-Hung h caux sienx ninh nyei mienh.

2. HOC-DAUH: Hnavg haaix nor buoqc zangc Ziouv Da'Nyeic diuh lingc

Doqc Nyei Ging-sou: Cuotv^i^yipv 20:4-6 "*Maiv dungx weic ganh zoux haaix nyungc miuc-fangx. Maiv gunv yiem gu'nguaaic lung h, yiem ga'ndiev ndau, fai yiem ndau-ndiev nyei wuom gu'nyuoz haaix nyungc nyei fangx. 5 Maiv dungx gueic njiec baaix naaiv deix miuc-mienv yaac maiv dungx zangc, weic zuqc yie, Ziouv, meih mbuo nyei Tin-Hung h, nzaeng jienv meih mbuo. Yie oix dingc nzorn g yie wuov deix mienh nyei zuiz, dingc taux ninh mbuo nyei buo bie doic zeiv-fun. 6 Mv baac haaix dauh hnamv yie, ei jienv yie nyei leiz zoux, yie ziouc hnamv ninh jiex mingh taux yietc cin doic."*

Gorngv Jiex gorn nyei waac:

1. Da'yietv diuh lingc mbuo hoqc taux se horpc zuqc buoqc zangc haaix dauh: Tin-Hung h (cuotv liuz yie maiv dungx zangc ganh dauh zienh). Da'yietv diuh lingc benx gorn-ndoqv bun taux diuh-diuh. Da'yietv diuh lingc maiv bun sienx zorpc, zangc zienh fai zangc dieh nyungc ga'naaiv; kungx zangc Ziouv Tin-Hung h hnavg. Tin-Hung h nyei ziepc diuh lingc liepc daaih se bun taux dauh dauh mienh yiem norm-norm ziangh hoc.
2. Da'nyeic wuov diuh lingc njaaux taux mbuo hnavg haaix nor buoqc zangc: *Maiv dungx weic ganh zoux haaix nyungc miuc-fangx*". Da'nyeic diuh lingc njaaux mbuo buoqc zangc zien wuov dauh Ziouv.

Se gorngv Ging-sou gorngv "maiv dungx zangc zienh" se maaih eix-leiz gorngv oix zuqc zangc Ziouv. "maiv dungx zoux miuc-fangx zangc". Maaih eix-leiz gorngv oix zuqc buoqc zangc horpc ei Tin-Hung h nyei za'eix. Nyungc zeiv se: hnavg mbuo

gorngv mbuox mbuo nyei fu'jueiv, maiv dungx cuotv ka'dau, se maaih eix-leiz gorngv mbuo oix ninh mbuo yiem biau v gu'nyouz. Maiv dungx zoux ndaau forqv se maaih eix-leiz gorngv oix zuqc fiou ndaau nzengc.

Da'nyeic diuh leiz-late se njaaux taux buoqc zangc nyei javu. Tin-Hungh maiv oix ninh nyei mienh zangc/buoqc zangc zienh. Mbuo hngv haaix nor hiuv taux Tin-Hungh fai bieqc hnyouv taux ninh nyei fiem-fingx. Mbuo ziouc hngv wuov nor buoqc zangc ninh. Hngv naaic mbuo oix zuqc bieqc hnyouv ninh yaac ei ninh nyei waac.

Porv mengh ging-sou nyei waac:

A. Horpc zuqc hngv naaiv nor bieqc hnyouv taux Tin-Hungh

Se gorngv mbuo bieqc hnyouv dorngc Tin-Hungh nyei waac, mbuo nyei fiem-fingx, eix-leiz, mbuo zangc fai zoux yaac dorngc weic bieqc hnyouv dorngc!

1. Maiv haih dorh Tin-Hungh beiv, fai dorh ga'naaiv div

- Miuc-fangx pienx, fai pien, Tin-Hungh nyei fiem-fingx
- Miuc-fangx se ga'naaiv, ga'naaiv maiv haih div lingh wuonh, yaac maiv haih div mangc maiv buatec nyei Tin-Hungh. Maaih haaix nyungc haih dorh daaih div fai beiv Ziouv?
- **Yo^han 4:24** “Tin-Hungh se Lingh Wuonh” Zangc ninh nyei mienh oix zuqc longc singx lingh (hnyouv) yaac longc zien leiz zangc.
- **I^saa^yaa 40:25** Cing-Nzengc wuov dauh gorngv, “Meih mbuo dorh haaix dauh beiv yie? Haaix dauh caux yie fih hngv? Maiv maaih haaix dauh!
- Mbuo baamh mienh haih dorh mienh beiv mienh, dorh cie beiv cie...maiv maaih haaix nyungc haih beiv Tin-Hungh.
- **Nyungc zeiv**: maaih dauh zoux nqox nyei mienh qiaam jienv dauh sieqv, yietv buatec ninh nyei auv, ziouc gorngv, “Meih maa aqv! Maiv dungx bieqc hnyouv dorngc, naaiv dauh sieqv se nzueic hngv meih nor, yie qiaam ninh bun cing yie jangx zuqc meih, yie qiaam jienv ninh mv baac yie jangx zuqc meih, yaac hnamv gorngv ninh se meih.” Naaiv dauh auv sienx ninh nyei nqox nyei fai? Tin-Hungh yaac fih hngv nyei, meih dorh miuc-fangx daaih zangc, mv baac gorngv mbuo Tin-Hungh, “Naaiv fangx zoux bun yie jangx zuqc meih, Tin-Hungh...zien zien nor yie daaih zangc meih”. Maiv haih hngv naaic.
- Da'nyeic diuh leiz-late se gorngv, *Ziouv, meih mbuo nyei Tin-Hungh, nzaeng jienv meih mbuo*. Naaiv se cing-nzengc nyei nzaeng, horpc nyei nzaeng. Nzaeng maiv oix bun mbuo zangc haaix nyungc cuotv liuz Ninh.

2. Ih jaax hnoi nyei miuc-fangx

- Miuc-fangx se maiv zeiz kungx fangx dongh mienh longc hiec-dongh nanv daaih fai waax daaih, fai huei gatv daaih nyei ga'naaiv.
- Miuc-fangx se dongh meih hnamv, zoux, funx maaih jaa'zinh gauh camv jiex Tin-Hungh. Ih jaax hnoi, mbuo nyei gong, biau v, nyaanh, a'nziauh doic haih benx miuc-fangx bun mbuo (2 Ti^mo^tai 3:4 Baulo

gorngv setv mueiz nyei nyutv-zeiv mienh oix “hnamv oix duqv njien-youh gauh camv hnamv Tin-Hungh).

- Weic haaix nyungc Tin-Hungh zeix mbuo yaac heuc mbuo maiv dungx zangc zienh, yaac maiv dungx baaix miuc-fangx? “Weic mbuo yiem ninh ziangh jienv, mbuo haih nangh, haih mingh mingh daaih daaih.” (Gong-Zoh 17:28) Mbuo ziangh weic buoqc zangc Ziouv.

3. Miuc-fangx caux fangx hhangv haaix nor ganh nyungc

- Maiv dungx baaix miuc-fangx se maiv zeiz gorngv maiv haih maaiz duqv yietc nyungc fangx, fai fangx dongh gorngv taux sienx Tin-Hungh nyei jauv
- Da'nyeic diuh leiz-latc se donv maiv bun baaix miuc-fangx, maiv zeiz fangx. Se gorngv dorh fangx daaih beiv Tin-Hungh nor se benx miuc-fangx...mv baac fangx mangc nzueic hhangv se maiv zeiz (biangx).

B. Gorngv duqv mengh taux Tin-Hungh nyei Leiz-latc

1. Hniev haic nyei donv

“Maiv dungx gueic njiec baaix naaiv deix miuc-mienv yaac maiv dungx zangc, weic zuqc yie, Ziouv, meih mbuo nyei Tin-Hungh, nzaeng jienv meih mbuo. Yie oix dingc nzorng yie wuov deix mienh nyei zuiz, dingc taux ninh mbuo nyei buo biei doic zeiv-fun.” v5

Tin-Hungh gorngv baaix miuc-fangx se zuiz. Zuiz maaiah ninh nyei jaa-zinh taux buo, biei doic zeiv-fun. Naaiv maiv zeiz gorngv domh mienh zoux zuiz nor Tin-Hungh dingc fu'jueiv. Mv baac domh mienh zoux nyei zuiz hoic zuqc fu'jueiv. (Maa maaiah jienv sin buov in hoic gu'nquaaz.) Diez-maac zangc miuc-fangx yaac hoic fu'jueiv nyei.

2. Nyungc Zeiv yiem Ging-Sou

- **(2 Zunh Doic Douh 26:1-15)** Ninh bieqc zangc Tin-Hungh nyei biauv oix ziec bun Tin-Hungh. Maiv ei Tin-Hungh buoqc zangc mv baac ei ninh ganh nyei hnyouv. Maiv zeiz ninh nyei gong-buonc yaac maiv horpc zuqc zoux. Sai-mienh dangv jienv ninh, mv baac ninh qiex jiez, zoux maux, Tin-Hungh ziouc bun ninh liemh zeh maaiah gomh huv nyei baengc.
- **(2 Zunh Doic Douh 27:2)** Ninh maiv bieqc zangc Tin-Hungh nyei biauv. Baeqc fingx yaac zoux waaic camv. (Ninh nyei dae maiv zangc horpc Tin-Hungh, maiv duqv bieqc zangc Tin-Hungh nyei biauv. Jotham maiv mingh zangc Tin-Hungh nyei biauv: (Ninh gorngv, “yie nyei dae Uzziah zuqc mienh zunc cuotv zangc Tin-Hungh nyei biauv, yie maiv mingh zangc Ziouv nyei biauv, ninh ziouc maiv mingh”). Zoux dorn nyei mienh hhangv naaiv, mangc gaax zoux fun nyei mienh se hhangv haaix nor.
- **(2 Zunh doic douh 28)** Mbuo buatc zoux dae nyei mienh zangc dorngc, zoux dorn nyei mienh maiv zangc, zoux funx nyei mienh niv? A^hatc zoux hungh, ninh naanv Baalim nyei fangx daaih zangc (28:2). Baalim se Baal nyei caux doic zienh. Yiem 24 yiemc Ahaz zorqv zangc Tin-Hungh nyei ga'naaiv daaih haqv guangc nzengc, guon jienv maiv bun mienh zangc Tin-Hungh. Norm-norm gorqv yiem Ye^lu^sa^lem maaiah zienh nyei fangx.

3. Zoux kuv nyungc zeiv

- Longx jiex nyei yietc nyungc mbuo dauh dauh haih zoux nyei se zoux kuv nyungc zeiv bun mbuo nyei fu'jueiv, dorh ninh mbuo buoqc zangc Ziouv. Ganh oix zuqc buoqc zangc ndaangc cingx haih zoux nyungc zeiv. Cuotv^I^Yipv 20:6 Mv baac haaix dauh hnamv yie, ei jienv yie nyei leiz zoux, yie ziouc hnamv ninh jiex mingh taux yietc cin doic (maiv zeiz buo bei doic hnavg)
- **2 Ti^mo^tai 1:5** Baulo gorngv mbuox Ti^mo^tai “*Yie jangx zuqc meih zien-zien nyei sienx hnavg zinh ndaangc meih nyei daa gux Lo^itc caux meih nyei maa Yu^nitv zien-zien sienx wuov nor. Yie sienx dingc meih ih zanc yaac hnavg wuov nor sienx.*” Ninh nyei daa gux sienx, ninh nyei maa sienx, liuz Timothy yaac sienx. Mbuo haaix zanc cingx njaaux mbuo nyei fu'jueiv taux Tin-Hungh nyei javv?...Yiem (daa) ong (daa) gux...

C. Jorm Hnyouv buoqc zangc Ziouv

1. Maiv daan gorngv mbuo oix zuqc bieqc hnyouv Tin-Hungh nyei fiem-fingx, mbuo yaac oix zuqc gorngv duqv mengh Ziouv nyei leiz-latc bun mienh caux mbuo nyei hmuangv doic hiuv. Mbuo yaac oix zuqc daux gaux yaac zoux nyungc zeiv bun mbuo nyei fu'jueiv duqv buatec gorngv mbuo hnamv Tin-Hungh.
2. Tin-Hungh se longc jienv jiex yiem mbuo nyei maengc. Se gorngv yie naaic meih mbuo nyei fu'jueiv, haaix nyungc longc jienv jiex bun meih nyei dae, meih nyei maa? Ninh mbuo hnavg haaix nor dau? Tin-Hungh fai...? Meih mbuo nyei fu'jueiv horpc zuqc buatec yiem naaiv lungh ndiev longc jienv jiex bun ninh mbuo nyei dae maa se buoqc zangc Tin-Hungh.
3. Se gorngv domh mienh jorm hnyouv, ziepc zuoqv nyei buoqc zangc, fu'jueiv gengh haih buatec...maiv daan kungx njaaux hnavg.

Dorh ging-sou nyei waac daaih longc yiem maengc:

1. Meih hnavg haaix nor bieqc hnyouv Tin-Hungh ziouc biux mengh meih hnavg wuov nor buoqc zangc ninh aqv.
2. Mouz lanh mienh maaih nyungc buoqc zangc. Meih buoqc zangc haaix dauh fai haaix nyungc?
3. Kungx Tin-Hungh hnavg puix duqv meih buoqc zangc fai? Meih hnavg haaix nor buoqc zangc?
4. Meih ganh zaah mangc meih nyei maengc, Tin-Hungh se jienv jiex yiem meih nyei maengc nyei fai?

3. Hoc-DAUH: Nernh Jiex Nyei Mbuox

Da'faam diuh lingc

Doqc-Ging Sou Yiem: *Cuotv^I^yipv 20:7 “Maiv dungx la'guaih longc Ziouv, meih mbuo nyei Tin-Hungh nyei mbuox. Haaix dauh la'guaih longc Ziouv nyei mbuox, Ziouv oix dingc wuov dauh nyei zuiz.”*

Gorngv Jiex gorn nyei waac:

Da'yietv diuh leiz-latc, gorngv cuotv liuz Ziouv maiv dungx zangc ganh dauh zienh" biux mengh gorngv mbuox mbuo oix zuqc zangc haaix dauh. Kungx zangc nduqc dauh Tin-Hungh hngv, maiv bun zangc zorpc, zangc camv nyungc zienh. I^saa^laa^en mienh se hngv mbuo iu-mienh nor, Tin-Hungh dorh ninh mbuo cuotv I^yipv deic bung, zoux nouh nyei deic-bung, Iu-mienh duqv Tin-Hungh dorh mbuo cuotv mienv daaih sienx Tin-Hungh. Tin-Hungh maiv bun I^saa^laa^en mienh sienx zorpc I^yipv nyei zienh, fih hngv nyei bun mbuo Iu-Mienh maiv dungx dorh sienx mienv nyei eix-leiz daaih zorpc Tin-Hungh.

Da'nyeic wuov diuh leiz-latc, gorngv, "Maiv dungx weic ganh zoux haaix nyungc miuc-fangx." Biux mengh gorngv mbuo oix zuqc hngv haaix nor zangc Tin-Hungh. Weic Tin-Hungh se doz, mbuo maiv maaih haaix nyungc haih dorh daaih beiv fai div duqv ninh, weic naaiv mbuo maiv dungx zangc miuc-fangx, longc mbuo zoux daaih nyei ga'naaiv.

Da'faam diuh leiz-latc "Maiv dungx la'guaih longc Ziouv, meih mbuo nyei Tin-Hungh nyei mbuox." Biux mengh gorngv zangc Ziouv nyei mienh nyei eix oix zuqc hngv haaix, weic maiv bun la'guaih laengz, la'guaih gorngv, la'guaih longc Ziouv nyei mbuox pien.

Porv mengh ging-sou:

A. Mbuox maaih haaix nyungc eix-leiz? Mbuo hiuv mienh weic mbuo hiuv ninh mbuo nyei mbuox fai mengh hoc. Fih hngv nyei, Tin-Hungh nyei mbuox caux ninh nyei mengh hoc biux mengh taux ninh se dongh haaix dauh, ninh nyei fiem-fingx, caux ninh nyei eix se hngv haaix. Ninh nyei mbuox biux mengh gorngv mbuo hngv haaix nor haih caux ninh jiu tong, ninh hngv haaix nor haih tengx mbuo.

Mbuox maaih haaix nyungc eix-leiz? Weic haaix nyungc mbuox longc jienv? Yiem Ging-Sou nyei ziangh hoc, gu'nguaaz cuotv seix, domh mienh dauh-gaux, liuz tengx cuotv mbuox, wuov dauh fu'jueiv hlo daaih ei jienv ninh nyei mbuox nyei eix-leiz zoux . Mbuo buatc mienh camv yiem ging-sou mbuox doix ninh mbuo nyei fiem-fingx. Longc Yesu zoux nyungc zeiv. Tin-cai gorngv mbuox Yo^sepv, "meih oix zuqc tengx wuov dauh dorn cuotv mbuox heuc Yesu, weic zuqc ninh oix njoux ninh nyei baeqc fingx leih ndutv ninh mbuo nyei zuiz" (**Matv^tai 1:21**) Yesu maaih eix-leiz gorngv Yo^ho^waa njoux.

- **Mbuo hiuv duqv Ziouv nyei fiem-fingx weic ninh nyei mbuox:** Tin-Hungh gorngv yie se hngv naaiv. Yietc nyungc mbuox biux mengh yietc nyungc fiem-fingx. (Nyungc zeiv: goux yungh ziouv)
- **Maaih hatc maaz yiem Ziouv nyei mbuox (Yo^han 14:14** "se gorngv meih mbuo dengv yie nyei mbuox tov haaix nyungc yie zungv oix zoux wuov nyungc"; **Ko^lo^si. 3:17** "maiv gunv zoux haaix nyungc fai gorngv haaix nyungc, oix zuqc dengv Ziouv Yesu nyei mbuox zoux. Yaac oix zuqc dengv Yesu nyei mbuox laengz zingh Zangc Diex Tin-Hungh")
- **Mbuo kaux duqv wuonv yiem Ziouv nyei mbuox (Cong-mengh 18:10** "Ziouv nyei mbuox se wuonv haic nyei laauh, kuv mienh tiux bieqc mingh ziouc baengh orn aqv.")

- **Daux gaux zuqc dengv Yesu nyei mbuox tov ei Ziouv nyei za'eix**(Yo[^]han 16:23-24)

B. Maiv dungx La'guaih longc (maiv faix fim, longc maiv maaih eix-leiz nyei longc Ziouv nyei mbuox:

1. **Gorngv ki** (Matv[^]tai.12:34 “hnyouv zaangh buangv haaix nyungc, nzuih ziouc gorngv cuotv wuov nyungc aqv.”) biux mengh hnyouv orqv haic.
 - a) Maiv maaih yietv, maiv maaih nyeic nyei gorngv taux Tin-Hungh nyei mbuox
 - b) Gorngv waac-zaanc, longc duqv mbuox zaanc haic

2. **La'guaih longc fai gorngv Ziouv nyei mbuox** (E[^]fe[^]so. 5:3 “meih mbuo zoux Ziouv nyei mienh ziouc yiem meih mbuo mbu'ndongx maiv dungx zoux, liemh maiv dungx gorngv taux nziaauc sieqv nziaauc dorn nyei sic, fai maiv cing-nzengc nyei sic....”) Nyungc zeiv: “Laengz zingh Tin-Hungh, fai tov Tin-Hungh ceix fuqv...gorngv benx waac nzamc hnangv!” Nzaeng jaax nyei ziangh hoc, nzaeng maiv hingh liuz ziouc gorngv... “Maaih Tin-Hungh hiuv fai buate nyei...fai Tin-Hungh ganh...) Yiem **Matv[^]tai 5:34-37** Maiv dungx ziangv haaix nyungc laengz waac...Meih oix zuqc gorngv zaqc zeiz fai maiv zeiz gaux aqv.”

3. **Beih zaqc hnyouv njuotv nyei longc Ziouv nyei mbuox** (Matv[^]tai.7:22-23 heuc jienv ziouv mv baac ninh maiv laengz):

- a. Gorngv sienx, mv baac maiv ei jienv zoux. (...se gorngv yie naaic meih mbuo nyei fu'jueiv, yiem wuov biauvi nyei ziangh hoc, meih mbuo ei Tin-Hungh nyei fai?
- b. Baux nzung, mv baac maengc maiv doix baux nyei nzung: hnangv ih hnoi mbuo baux nyei nzung...buoqc zangc fai fongc hore nzung...

4. **Doix-dekc Tin-Hungh nyei leiz**: Laengz waac caux Tin-Hungh mv baac maiv ei jienv zoux...naaiv se la'guaih longc ninh nyei mbuox.

La'guaaih longc Ziouv nyei mbuox nyei mienh, “Ziouv oix dingc wuov dauh nyei zuiz” v.7. Gengh zuqc gamh nziex taux zuqc Ziouv dingc nyei zuiz.

C. Hnangv haaix nor longc ninh nyei mbuox (Ko[^]lo[^]si 3:17 “hnangv naaiv, maiv gunv meih mbuo zoux haaix nyungc, fai **gorngv haaix nyungc**, oix zuqc dengv Ziouv Yesu nyei mbuox zoux. Yaac oix zuqc dengv ninh nyei mbuox laengz zingh Zangc Diex Tin-Hungh)

1. **Mbuo se Yesu nyei Mienh; mbuo ndaam ninh nyei mbuox**, maiv daan mienh hnangv, weic mbuo sienx Yesu, mbuo se “Yesu nyei Mienh” (**Gong-zoh 11:26** mienh heuc sai-gorx mbuox zoux Yesu Mienh; **2 Ti[^]mo[^]tai 2:19** “Ziouv hiuv duqv haaix dauh zoux ninh ganh nyei mienh, yaac gorngv, haaix dauh nyiemc Ziouv nyei mbuox, wuov dauh oix zuqc guangc nzengc yietc zungv waaic sic”)

2. Mbuo oix zuqc dorh ninh nyei mbuox mingh mbuox mienh.

3. Mbuo horpc zuqc hiuv duqv ninh nyei mbuox, bungx hnyouv ninh nyei mbuox, bangc ninh nyei mbuox. (Prov. 9:10 Mienh zieqv duqv Cing-nzengc wuov dauh ziouc jaa mengh baeqc fai jaa bungx hnyouv).

4. Mbuo yaac zuqc diev kouw weic ninh nyei mbuox (Gong-Zoh 5:40-42 zuqc mborqv zuqc diev weic zunh kuv fiensex): Ninh nyei mbuox oix zuqc gauh longc jienv mbuo nyei mbuox. Baulo gorngv, “*ye caux Giduc juangc ding ziepc nzangc jaax daic cingx daaih ih zanc ziangh jienv wuov dauh se maiv zeiz yie ,se Giduc yiem yie gu’nyuoz ziangh jienv .Yie ih zanc ziangh nyei maengc yie duqv ziangh weic zuqc yie sienx Tin-Hungh nyei Dorn, dongh hnamv yie yaac weic yie siev maengc wuov dauh.*” (**Gaa^laa^tie 2:20**)

Dorh Ging-sou nyei eix-leiz daaih longc yiem maengc:

1. Mienh la’ guaih longc Ziouv nyei mbuox nyei mienh se maiv taaih Ziouv yaac maiv gamh nziex ninh. Mbuo hoqc liuz ih hnoi, gengh oix zuqc faix fim nyei longc duqv horpc Ziouv nyei mbuox.
2. Da’ faam diuh leiz-late maiv bun mienh la’ guaih longc Ziouv nyei mbuox weic zuqc ninh nyei mbuox se biux mengh gorngv taux ninh ganh aqv.
3. Mbuo yaac zuqc dengv ninh nyei mbuox tov, dengv ninh nyei mbuox caux ninh jiu tong. Ziouv nyei norm-norm mbuox biux mengh ninh nyei fiem-fingx, ninh zoux nyei, ninh nyei eix-leiz. Weic ninh zeix mbuo daaih, se gorngv mbuo jaa hiuv ninh camv jienv mingh mbuo yaac hiuv duqv ganh camv jienv mingh.
4. Mbuo maiv daan ndaam mengh heuc “Yesu Mienh” hnanv, mbuo oix zuqc dorh ninh nyei mbuox mingh zunh mbuox lungh ndiev mienh. Hnanv **1 Bide 2:9** gorngv nor, “*...mbuo zoux Tin-Hungh ginv wuov fingx, zoux sai mienh fuh sux Tin-Hungh, zoux cing-nzengc nyei fingx, benx Tin-Hungh ganh nyei baeqc fingx weic zunh ninh zoux nyei mbuoqc horngh nyei sic. Ninh heuc meih mbuo cuotv hmuangx daaih bieqc ninh njang haic nyei njang*”

4. HOC-DAUH: Yesu zoux mbuo nyei dingh gong hnoi
Da’feix diuh lingc

Doqc Ging-Sou Yiem: Cuotv^i^yipv 20:8-11 *Mv baac da’cietv hnoi wuov hnoi se Dingh Gong Hnoi weic fungx bun Ziouv. Wuov hnoi maiv dungx zoux haaix nyungc gong. Meih mbuo ganh Caux meih mbuo nyei naamh nyouz, meih mbuo nyei nouh gauv Nouh beiz, meih mbuo nyei saeng-kuv, fai yiem meih mbuo nyei Zingh nyei ganh fingx mienh yaac maiv dungx zoux haaix nyungc gong. 11 Weic zuqc Ziouv longc juqv hnoi zeix lungh zeix ndau zeix koiv caux yiem naaiv deix gu’nyuoz nyei yietc zungv ga’naaiv. Mv baac siec hnoi wuov hnoi Tin-Hungh dingh gong aqv. Weic naaiv Tin-Hungh ceix fuqv wuov norm hnoi benx ninh nyei cing-nzengc hnoi. **Maako 2: 27-28; (beiv mangc. Matv^taai***

12:1-8; *Lugaa 6:1-5 23) Maaih norm Dingh Gong Hnoi, Yesu jiex mienh nyei mbiauh ndeic. Gan jauv mingh wuov zanc ninh nyei sai-gorx nienv mbiauh dorv. 24 Faa^li^si Mienh ziouc mbuox Yesu, "Mangc gaax, ei mbuo nyei leiz, Dingh Gong Hnoi maiv horpc zuqc hnavg naaiv nor zoux. Meih nyei sai-gorx weic haaix diuc zoux?" 25 Yesu dau, "Meih mbuo maiv gaengh doqc jiex naaiv diuh gouv fai? Zinh ndaangc Ndaawitv Hungh caux gan ninh wuov deix mienh hnyouv sie, qiemx zuqc nyanc, ninh mbuo hnavg haaix nor zoux? 26 Dongh Aa^mbi^yaa^taa zoux hlo jiex wuov dauh domh sai mienh wuov zanc, Ndaawitv bieqc zangc Tin-Hung h nyei Ndopv-Liuh zorqv gengx Tin-Hung h wuov deix njuov nyanc. Kungx sai mienh ganh maaih leiz nyanc hnavg. Mv baac Ndaawitv nyanc yaac bun gan ninh wuov deix mienh juangc jienv nyanc." 27 Yesu mbuox ninh mbuo, "Dingh Gong Hnoi Tin-Hung h liepc daaih tengx mienh. Maiv zeiz zeix mienh daaih weic Dingh Gong Hnoi. 28 Weic naaiv, yie, Baamh Mienh nyei Dorn, zoux Dingh Gong Hnoi nyei Ziouv."*

Matv^tai. 11:28 *"Meih mbuo haaix dauh kouv hnavg nyiex ga'naaiv hniev, Gunv daaih yie naaiv. Yie oix bun meih mbuo hitv kuonx.*

GorngvJiex gorn waac:

Da'yietv diuh leiz-late, gorngv cuotv liuz Ziouv maiv dungx zangc ganh dauh zienh" biux mengh gorngv mbuo oix zuqc zangc nduqc dauh Tin-Hung h hnavg, maiv bun zangc zorpc, zangc ganh dauh zienh.

Da'nyeic wuov diuh leiz-late, gorngv, "Maiv dungx weic ganh zoux haaix nyungc miuc-fangx." Biux mengh gorngv mbuo oix zuqc hnavg haaix nor buoqc zangc Tin-Hung h. Weic Tin-Hung h se doz, mbuo maiv maaih haaix nyungc haih dorh daaih beiv fai div duqv ninh, weic naaiv mbuo maiv dungx zangc miuc-fangx, longc mbuo zoux daaih nyei ga'naaiv.

Da'faam diuh leiz-late "Maiv dungx la'guaih longc Ziouv, meih mbuo nyei Tin-Hung h nyei mbuox." Biux mengh gorngv zangc Ziouv nyei mienh nyei eix oix zuqc hnavg haaix. Weic maiv bun la'guaih leangz, la'guaih gorngv, la'guaih longc Ziouv nyei mbuox.

Da'feix diuh leiz-late gorngv dingh gong hnoi benx cing-nzengc nyei hnoi. Tin-Hung h dingh gong weic mangc ninh zeix daaih nyei, I^saa^laa^en mienh dingh gong hitv kuonx benx laengz nyei ngaengc waac caux Tin-Hung h. Ih hnoi jiu-baang mienh dingh gong hitv kuonx yiem Yesu.

Porv mengh ging-sou: 3 norm dingh gong hitv kuonx hnoi yiem Ging-sou

A. Zeix Nyungc-nyungc liuz nyei hitv/dingh gong (bun taux Tin-Hung h)

1. Zeix ziangx nyungc-nyungc yiem juqv hnoi, Tin-Hung h dingh gong yiem da'cietv hnoi (***Tin deic douh 2:1-3***) *Lungh ndau caux maanc muotc hnavg naaiv nor zeix ziangx nzengc aqv. 2 Taux da'cietv hnoi Tin-Hung h zoux ziangx ninh zoux nyei gong, da'cietv hnoi ninh ziouc dingh gong hitv kuonx. 3 Tin-Hung h ceix fuqv da'cietv hnoi bun wuov norm hnoi benx cing-nzengc hnoi, weic zuqc ninh zeix lungh zeix ndau nyei gong ziangx. Ninh yaac dingh gong hitvkuonx.*
2. Tin-Hung h haiz kouv haic cingx hitv kuonx fai? Maiv zeiz! Tin-Hung h yietc liuz maiv kouv (I^saa^yaa 40:28 *Tin-Hung h maiv kuonx yaac maiv kouv*) Tin-Hung h dingh gong hitv kuonx weic bun hnamv ninh zoux nyei caux a'hniev ninh zeix nyei nyungc-nyungc

3. Zeix ziangx nyei hitv kuonx fai dingh gong zuqc nyauv...weic zuiz bieqc baamh gen (Yo^han 5:1-17)

B. Laengz ngaengc waac nyei hitv/dingh gong (Bun Taux I^saa^laa^en)

1. Dingh gong hnoi=hitv kuonx hnoi, da'cietv hnoi (Cuotv^i^yipv. 20:10 “*Da'cietv hnoi wuov hnoi se **dingh gong** hnoi fungx bun Ziouv*), Naaiv hnoi se doix zuqc (Saturday): Naaiv benx Tin-Hungh nyei laengz ngaengc waac caux I^saa^laa^en mienh (weic naaiv cingx heuc laengz ngaengc waac nyei dingh gong/hitv kuonx hnoi)
2. Mbuo horpc zuqc dingh gong hitv kuonx yiem naaiv norm hnoi nyei fai? Hnangv yiem loz-ngaengc waac mienh zoux nor fai?

Oix zuqc faix fim:

Se gorngv zoux dorngc dingh gong hnoi zuqc daic wuov zanc aqv (Cuotv^i^yipv 31:15 “*Meih mbuo longc juqv hnoi zoux gong, mv baac siec hnoi wuov hnoi se Dingh Gong hnoi, oix zuqc hitv kuonx, se cing-nzengc nyei hnoi fungx bun Ziouv. **Haaix dauh longc wuov norm hnoi zoux gong, oix zuqc daix daic.***”). Nyungc zeiv se gorngv meih buov douz nor zuqc daic aqv (Cuotv^i^yipv. 35:2-3 *Mieh mbuo longc juqv hnoi zoux gong, mv baac siec hnoi wuov hnoi se Dingh Gong hnoi, oix zuqc hitv kuonx, se cing-nzengc nyei hnoi fungx bun Ziouv. Wuov hnoi haaix dauh zoux **haaix nyungc gong, oix zuqc daix daic.**, dingh gong hnoi, yiem meih mbuo nyei biau, **liemh maiv dungx buov douz.***”)

Lewi 25:4 *Mv baac da'cietv hnyangx se dingh gong hnyangx weic fungx bun Ziouv. Oix zuqc bun ndau hitv kuonx. Maiv dungx zuangx ga'naaiv meih mbuo nyei lingh ndeic...*

Saauv Mienh 15:32-36 32 *I^saa^laa^en Mienh yiem deic-bung-huaang wuov zanc, buatc dauh mienh doix **Dingh Gong Hnoi mingh gaeqv zaangh.*** 33 *Buatc ninh wuov deix mienh ziouc dorh ninh mingh taux Mose caux Aalon caux zuangx baeqc fingx wuov.* 34 *Ninh mbuo wuonx jienv weic zuqc mienh maiv gaengh hiuv cing oix zuqc hnangv haaix nor zoux bun ninh.* 35 *Ziouv gorngv mbuox Mose, “Naaiv laanh mienh zungv oix zuqc daic. Zuangx baeqc fingx oix zuqc dorh ninh cuotv ga'nyiec ziqc ndopv-liuh ciangv, zorqv la'bieiv zong daic ninh.”* 36 *Zuangx baeqc fingx ziouc dorh ninh cuotv ga'nyiec ziqc ndopv-liuh ciangv, zorqv la'bieiv zong daic ninh, hnangv Ziouv mbuox Mose wuov nor.*

3. I^saa^laa^en mienh yiem Tin-Hungh gunv mienh nyei ziangh hoc. Dingh gong hnoi fai hitv kuonx hnoi se benx Tin-Hungh nyei fuqv bun taux ninh mbuo. Mv baac weic ninh mbuo maiv muangx Tin-Hungh nyei waac ziouc benx hniev nyei bun ninh mbuo. Faa^laa^si janx nzorn Yesu weic Yesu zorc mienh yiem dingh-gong hnoi, **Maa^ko 3:2-4** “*maaih deix mienh oix lorz javv gox Yesu, Ninh mbuo ziouc cienh mangc jienv mangc gaax ninh longc dingh gong nyei hnoi zorc wuov dauh mienh nyei buoz fai? Yesu mbuo zuoz waaic wuov dauh mienh, Meih daaih naaiv nza'hmien maengc oc, Ninh aengx naaic wuov deix mienh, ei mbuo nyei leiz, Dingh gong hnoi mbuo haih zoux haaix nyungc? Zoux longx fai zoux waaic, njoux maengc fai hoic maengc? Mv baac ninh mbuo maiv kolo... Yesu mbuox buoz*

waaic wuov dauh mienh, sung meih nyei buoz cuotv daaih maah, sung cuotv daaih, zuoz ziouc longx nzengc hnangv loz wuov nor. Wuov deix faa^li^si mienh ziouc yiem wuoc dorngh cuotv mingh caux deix gan Helotv Hungh wuov jauv mienh caangh laangh oix zuqc hnangv haaix nor daix Yesu. ; **Lugaa 13:14-16; 14:3-5; Yo^han 5:9-10;9:14**)

4. **Yo^han 9:16** Yesu zorc yiem toi m'zing maengh nyei mienh liuz “Maaih deix Faa^li^si mienh gorngv, tengx m'zing mangc duqv buac wuov laanh mienh maiv zeiz yiem Tin-Hungh daaih weic zuqc ninh maiv ei Dingh Gong Hnoi nyei leiz zoux”.

C. Ziepc nzangc jaax nyei hitv/dingh gong hnoi (bun taux jiu-baang)

1. Loz-Ngaengc waac nyei dingh gong hitv kuonx hnoi se hnangv douc nyei waac nor bun mienh mangc fai nuqv taux Yesu Giduc
2. Tin-Hungh Diex dingh gong hitv kuonx weic ninh zeix ziangh nyungc-nyungc; Yesu hitv kuonx weic siang-zeix nyei nyungc-nyungc (**2 Ko^lin^to. 5:17** Haaix dauh caux Giduc juangc maengc ziangh, wuov dauh benx siang-zeix daaih nyei mienh). Yesu daaih zuoqc zuiz mienh. “Nzoih zunh aqv loh” (Yo^han 19:30). Yesu zoux ziangx zuoqc zuiz-mienh nyei gong ninh zueiz jienv Tin-Hungh nyei mbiaauc maengx (**Hipv^lu.10:12** Mv baac Giduc weic zuiz siev ninh ganh zoux ziec nyei ga'naaiv, ziec yietc nzunc dorngh yietc liuz aqv. Nqa'haav ninh zueiz jienv Tin-Hungh nyei mbiaauc maengx
3. Yiem Loz-Ngaengc waac zoux sai mienh nyei mienh maiv haih ziangx, maiv haih zueiz jienv. Mv baac Yesu zoux ziangx ninh nyei gong, longc ninh ganh benx ziec nyei zoux yietc nzunc. Weic ninh zoux nyei gong ziangx mi'aqv, Ninh bun mbuo hitv yiem ninh zoux nyei gong (Ko^lo^si. 2:13-17; **Matv^tai. 11:28** “Meih mbuo haaix dauh kouv hnangv nyiex ga'naaiv kouv hnangv nyiex ga'naaiv hniev, gunv daaih yie naaiv, **Yie oix bun meih mbuo hitv kuonx/dingh gong**”).
4. **Hipv^lu 4:9-10** “Hnangv naaic, weic Tin-Hungh nyei baeqc fingx aengx maaih norm dingh gong hitv kuonx hnoi. 10 Weic zuqc haaix dauh duqv bieqc Tin-Hungh bun nyei hitv kuonx dorngh, wuov dauh duqv dingh ninh ganh nyei gong hitv kuonx, hnangv Tin-Hungh dingh gong hitv kuonx nor.” **Sienx Giduc mienh hitv yiem Yesu zoux nyei dunh yunh zuoqc zuiz-mienh nzuonx nyei gong.**
5. **Ziouv Nyei Hnoi – (Lauc yaangh 1:10 “maaih norm Ziouv nyei hnoi...)** Leiz-baaix yietv se Sunday, Sienx Giduc mienh longc buoqc zangc ceng baaix Tin-Hungh hnangv dingh gong hitv kuonx hnoi nor. Weic Yesu daic mingh aengx nangh daaih, Ziouv nyei hnoi se div hnangv dingh gong hnoi yiem loz-ngaengc waac nor. **Weic haaix nyunge?**
 - a). Weic Yesu nangh yiem da'yietv wuov hnoi (**Maako 16:2,19; Matv^tai 28:1** Jiex liuz dingh gong hnoi, dongh leiz baaix wuov hnoi (leiz –baaix nyei da'yietv hnoi))
 - b). Yesu panh nangh liuz ninh daaih lorz ninh nyei sai-gorx mbuo yiem da'yietv wuov hnoi (**Yo^han 20:19** Wuov norm leiz baaix hnoi, nziemx yangh nyei ziangh hoc, Sai-gorx mbuo gapv zunv wuov qongx biauv...).
 - c). Tin-Hungh paaiv sai-gorx mingh zunh kuv fieng yiem da'yietv wuov hnoi (**Yo^han 20:21** “yie nyei die hnangv haaix nor paaiv yie mingh yie yaac...). Sai-gorx mbuo duqv zipv Singx Lingh yiem da'yietv wuov hnoi

(Yo[^]han 20:22 zipv singx lingh). Jiu-baang jiex gorn yiem da'yietv wuov hnoi (Gong-zoh 2). Laauc Yaangh wuov buonv sou, laauc yaangh yiem da'yietv wuov hnoi (Laauc Yaangh. 1:10 Maaih hnoi ziouv nyei hnoi...).

- **d).** Jiex gorn nyei jiu-baang gapv zunv buoqc zangc yiem da'yietv wuov hnoi (**Gong-zoh 20:7 *Leiz-baaix hnoi wuov muoz, dongh yie mbuo gapv zunv maeqv njuov wuov zanc. Baulo gorngv waac njaaux zuangx mienh...***”).
- **e).** Jiu-baang siou fongc horc nyaanh yiem leiz-baaix hnoi fai da'yietv wuov hnoi (**1 Ko[^]lin[^]to16:2 *Norm-norm leiz baaix hnoi meih mbuo muoz dauh mienh ziux meih mbuo zornc duqv nyei nyaanh oix zuqc zorqv deix cuotv daaih siou jienv. Yie daaih wuov zanc ziouc maiv zuqc gapv nyaanh aqv.***)

Dorh ging-sou daaih longc yiem maengc:

Buo norm dingh gong hitv kuonx hnoi, Tin-Hungh dingh weic mangc ninh zeix daaih nyei nyungc-nyungc ga'naaiv. I[^]saa[^]laa[^]en mienh dingh gong hitv kuonx weic Tin-Hungh caux ninh mbuo laengz ngaengc waac weic bun ninh mbuo hitv kuonx caux longc ziangh hoc caux Tin-Hungh. Jiu-baang dingh gong hitv kuonx yiem Yesu Giduc zoux ziangx nyei gong, Jiu-baang hitv kuonx yiem Yesu, mv baac buoqc zangc yiem Ziouv nyei hnoi.

5. HOC-DAUH: Tongx nimc diex maac **Da'hmz diuh lingc**

Doqc Ging-Sou Yiem: Cuotv[^]i[^]yipv 20:12 *Oix zuqc tongx nimc meih mbuo nyei diex maac, meih mbuo cingx daaih ziangh duqv siouc nyuonh ndaauv yiem Ziouv, meih mbuo nyei Tin-Hungh, bun meih mbuo wuov norm deic-bung;E[^]fe[^]so 6:1-4* “Fu'jueiv aac, weic zuqc meih mbuo sienx Ziouv Yesu, meih mbuo oix zuqc muangx diex maac nyei waac. Hnangv naaiv zoux se horpc nyei. 2 “Oix zuqc tongx nimc meih mbuo nyei diex maac.” Naaiv se da'yietv diuh lingc maaih laengz nyei waac caux jienv. 3 Hnangv naaiv, “Weic bun meih mbuo duqv longx yaac ziangh duqv siouc nyuonh ndaauv yiem baamh gen.” 4 Zoux die nyei mienh aah! Maiv dungx cuoqv meih mbuo nyei fu'jueiv qiex jiez. Oix zuqc ei Ziouv Yesu nyei leiz dorh longx fu'jueiv, njaaux ninh mbuo muangx waac.”

Gorngv Jiex gorn nyei waac:

Da'hmz diuh leiz-late gorngv oix zuqc tongx nimc mbuo nyei diex maac, wuov nyungc mbuo zoux dae zoux maa nyei mienh hnangv haaix nor zoux puix duqv mbuo nyei fu'jueiv tongx nimc? Mbuo horpc zuqc hnangv haaix nor tongx nimc mbuo nyei diex maac? Naaiv diuh lingc se da'yietv wuov diuh caux nduqc diuh lingc dongh maaih laengz nyei waac. Naaiv diuh lingh maaih i douc: da'yietv, gorngv taux fu'jueix hnangv haaix nor tongx nimc diex maac. Da'nyeic gorngv taux diex maac nyei mienh hnangv haaix nor zoux puix duqv ninh mbuo nyei fu'jueiv tongx nimc.

Porv mengh ging-sou:

A. Benx puix duqv tongx nimc nyei diex maac

1. Benx hnamv Tin-Hungh nyei diex maac (maiv dan mbuox mbuo nyei fu'jueiv sienx Tin-Hungh oix zuqc zoux nyungc zeiv bun ninh mbuo zuotc) Njaaux fu'jueiv taaih Tin-Hungh, longc ging-sou nyei hatc maaz njaaux.
2. Benx ziepc zuoqv gan longx Tin-Hungh nyei diex maac (Zoux nyei sic fih hnavg yiem norm-norm dorngx)
3. Maiv gunv hnavg haaix nor, fu'jueiv horpc zuqc tongx nimc diex maac. Maiv gunv gorngv ninh mbuo nyei diex maac puix duqv fai maiv puix duqv...ninh mbuo yungx caux dorh mbuo hlo daaih...mv baac se gorngv diex maac zoux sic puix duqv tongx nimc nor gauh hungh heic bun fu'jueiv tongx nimc ninh mbuo.
4. Domh mienh zoux nyei nyungc zeiv bun fu'jueiv puix duqv tongx nimc nor gauh hungh heic bun fu'jueiv tongx nimc Tin-Hungh
5. Baulo gorngv mbuox fu'jueiv oix zuqc muangx waac, ninh yaac gorngv mbuox domh mienh oix zuqc zoux sic puix duqv fu'jueiv tongx nimc. Baulo heuc zoux die nyei mienh maiv dungx cuoqv fu'jueiv qiex jiex. (nyungc zeiv mborqv njaaux weic fu'jueiv zoux dorngc maiv zeiz weic domh mienh qiex jiex). Zoux domh mienh nyei mienh oix zuqc ei jienv Ziouv nyei leiz njaaux caux dorh maiv zeiz ei ganh nyei hnyouv fai za'eix.

B. Hnavg haaix nor benx puix duqv tongx nimc nyei domh mienh

1. Hnamv fu'jueiv, ceix ninh mbuo faaux (E^{fe}so 6:4; Ko^{lo}si 3:21)
2. Goux jienv hatc jienv fu'jueiv (Cong-mengh 13:24;22:15)
3. Zoux nyungc zeiv dorh fu'jueiv (Cong-mengh 22:6)
4. Longc ziangh hoc caux fu'jueiv

C. Hnavg haaix nor tongx nimc diex maac

1. Tongx nimc yiem janx nyei waac maaih eix-leiz gorngv dorh domh mienh waac daaih longc, taaih ninh mbuo caux ninh mbuo gorngv nyei waac.
2. Muangx Ziouv nyei waac, yaac muangx diex maac nyei waac (E^{fe}so 6:1-3)
3. Goux diex maac dongh ninh mbuo qiemx zuqc nyei ziangh hoc
4. Oix zuqc hatc fu'jueiv muangx waac, mienh lunh mienh oix zuqc ginv muangc waac, benx domh mienh nyei ziangh hoc nor oix lanh muangx lanh.

Dorh ging-sou daaih longc yiem maengc:

1. Zoux diex maac nyei mienh aac, meih zoux nyei sic puix duqv meih nyei fu'jueiv taaih caux tongx nimc nyei fai? Meih zoux nyei biux mengh meih ganh buoqc Tin-Hungh nyei fai? Fu'jueiv aac, tongx nimc meih nyei diex maac weic ninh mbuo zoux meih nyei diex maac maiv dan kungx weic ninh mbuo puix duqv hnavg mv baac se gorngv zoux diex maac nyei zoux puix duqv tongx nimc nor gengh hungh heic bun fu'jueiv tongx nimc ninh mbuo. Fu'jueiv mienh, meih hnavg haaix nor biux mengh gorngv meih tongx nimc meih nyei diex maac?
2. Nyungc zeiv: Domh mienh haih dorh duqv nduqc nyungc mingh Tin-dorng

hngv, se ninh mbuo nyei fu'jueiv (se gorngv ninh mbuo nyei fu'jueiv sienx Tin-Hungh.

3. Da'hmz diuh lingc se maiv daan gorngv mbuox fu'jueiv tongx nimc ninh mbuo nyei diex maac hngv, yaac mbuox diex maac hngv haaix nor zoux puix duqv tongx nimc nyei mienh.
4. Yiem puix duqv tongx nimc nyei diex maac zoux bun fu'jueiv gauh hungh heic duqv tongx nimc ninh mbuo.
5. Orn taux diex maac dongh zoux puix duqv tongx nimc nyei mienh mv baac fu'jueiv maiv oix tongx nimc ninh mbuo...gunv zoux horpc Tin-Hungh ei jienv ninh nyei za'eix zoux, yaac daux gauh weic fu'jueiv.

6. HOC-DAUH: Yesu Giduc bun maengc **Da'luoqc diuh lingc**

Doqc Ging-Sou Yiem: Cuotv^i^yipv 20:13 “Maiv dungx daix mienh.”

Tin-deic douh. 9:6 “Haaix dauh daix mienh, bun nziaamv liouc cuotv, wuov dauh zungv zuqc mienh daix, bun nziaamv liouc cuotv, weic zuqc Tin-Hungh zeix mienh, se zeix daaih zuangv ninh ganh.”

Matv^tai. 5:21-22 “Loz-hnoi njaaux mienh naaiv deix waac meih mbuo haiz jiex nyei, ‘Maiv dungx daix mienh. Haaix dauh daix mienh oix zuqc dinge zuiz.’ 22 Mv baac yie mbuox meih mbuo, haaix dauh qiex jiez ninh nyei gorx-youz, zungv zuqc siemv zuiz aqv. Haaix dauh hemx ninh nyei gorx-youz, ‘Ga'naaiv-hngongx aah!’, wuov dauh zuqc dorh mingh Gunv Sic Wuic siemv zuiz. Haaix dauh hemx ninh nyei gorx-youz, ‘Ga'naaiv-mbuo piqv’, gamh nziex wuov dauh zic duqv ndortv deic nyuoqc nyei douz.

Yo^han 10:10 Janx-zaqc (Yesu heuc sadaan zoux janx zaqc) daaih kungx oix nimc oix daix, oix zoux mietc, mv baac yie daaih weic bun baamh mienh duqv ziangh maengc, zungv oix bun ninh mbuo duqv dunh yunh (Buangv) nyei maengc.

Gorngv Jiex gorn nyei waac:

“Maiv dungx daix mienh” naaiv yiemc ging-sou nyei eix-leiz se hatc maiv bun daix mienh, daix mienh se dongh jiez hnyouv baac-baac, mbenx jienv mborqv zoux waaic daix wuov nyungc. Naaiv maiv zeiz gorngv taux maiv haih dinge mienh daic weih ninh mbuo daix ganh dauh (Tin-deic douh 9:6 gorngv se gorngv meih daix mienh meih ziouc zuqc mienh daic aqv). Yiem I^saa^laa^en fngx Tin-Hungh nyei lingc yiem Cuotv^i^yipv 21:12 ““Haaix dauh mborqv mienh yaac mborqv daic, wuov dauh zungv oix zuqc dinge zuiz daix daic Mv baac haaix dauh jiez hnyouv baac-baac daix mienh daic, maiv gunv ninh biaux mingh ziouc ziec-dorngh, zungv oix zuqc zorqv ninh tor mingh dinge zuiz daix daic. 15 “Haaix dauh mborqv ninh nyei die fai maa nor, wuov dauh yaac oix zuqc dinge zuiz daix daic.”

Tin-Hungh oix naaiv diuh lingc zoux nyei se porv mengh yiem **Yo^han 10:10** Yesu gorngv, “**Janx-zaqc (Yesu heuc sadaan zoux janx zaqc) daaih kungx oix nimc oix daix, oix zoux mietc, mv baac yie daaih weic bun baamh mienh duqv ziangh maengc, zungv oix bun ninh mbuo duqv dunh yunh (Buangv) nyei maengc.**” Saadaan nyei mouz deic se nimc daix zoux mietc mienh nyei maengc...mv baac Yesu Giduc daaih

weic bun mienh maaih maengc, yaac zoux ziangh maengc nyei gorn.

Porv mengh ging-sou:

A. Sadaan zoux mietc maengc nyei gorn

1. **Sadaan yiem gorn wuov ninh m'daaih daix mienh (Yo[^]han 8:44** Yesu njaaux zien leiz mv baac Yiutai mienh oix daix ninh, yaac gorngv ninh zoux Apv[^]la[^]ham nyei zeiv- fun, yaac gorngv Yesu se gu'nguaaz toi, mv baac Yesu gorngv ninh mbuo se maiv zeiz Apv[^]la[^]ham nyei zeiv-fun: *Meih mbuo nyei die se mienv nyei hungh. Meih mbuo kungx oix ei jienv meih mbuo nyei die nyei eix zoux hnangv. Yiem gorn wuov ninh m'daaih daix mienh. Ninh yietc liuz maiv a'hneiv zien leiz, weic zuqc yiem ninh ganh maiv maaih zien leiz. Ninh gorngv-baeqc weic zuqc ninh ei ninh ganh nyei fiem-fingx m'daaih gorngv-baeqc. Ninh kungx gorngv-baeqc hnangv yaac zoux gorngv-baeqc nyei die.*)
2. Sadaan se zoux janx-zaqc caux mietc mienh nyei gorn, da'luoqc diuh lingc gorngv maiv dungx daix mienh, yaac maaih eix-leiz gorngv, simv nqoi Sadaan. Weic zuqc mienv nyei hungh yiem gorn m'daaih daix mienh, se gorngv meih mbuo daix mienh mienv se zoux meih mbuo nyei die.
3. Mienv nyei hungh doix-dekc zien leiz, doic-dekc maengc, yaac zoux gorngv baeqc nyei mienh nyei die.

B. Yesu se bun ziangh maengc nyei gorn

A. Sin zangc Ziangh jienv Nyei maengc

1. Maanc Muotc ninh zeix daaih, yaac benx gorn-nyuonh bun nyungc nyungc maaih maengc. (Yo[^]han 1:3-4 *Tin-Hungh longc Doz zeix cuotv maanc muotc. Maiv maaih yietc nyungc Tin-Hungh maiv longc Doz zeix. 4 Doz zoux gorn-nyuonh bun nyungc-nyungc maaih maengc ziangh. Naaiv nyungc maengc dorh njang daaih ziux baamh mienh; Col. 1:16*)
2. Tin-Hungh hnangv haaix nor zeix baamh mienh: (*Tin-deic douh 2:7 Zoux gau, Ziouv Tin-Hungh aengx zorqv deix nie nanv cuotv dauh mienh daaih yaac biomv maaih maengc nyei qiex bieqc wuov dauh mienh nyei mba'zorng. Wuov dauh mienh ziouc nangh daaih aqv.*)
3. Yesu zoux gorn-nyuonh bun nyungc nyungc maaih maengc (Job 33:4 "Tin-Hungh zeix yie daaih yaac bun yie maaih qiex tauv..."; **Gong-zoh 17:25** (Baulo Yiem Athens zunh doz gorngv taux " Maiv gaengh hiuv duqv nyei wuov dauh Tin-Hungh..." "Ninh yaac maiv longc baamh mienh nyei buoz fuh sux ninh weic zuqc ninh maiv qiexx zuqc haaix nyungc. Daaux nzuonx **Tin-Hungh bun mbuo maaih Maengc maaih qiex tauv, yaac ceix maanc muotc bun mienh Maanh.**"

B. Lingh Wuonh nyei Maengc

Yesu bun lingh wuonh mienh, ninh se maengc, **Yo[^]han 14:6** Yesu dau, "Yie se dongh mingh Tin-Hungh wuov diuh jauv, yaac dongh zien leiz, **yaac dongh ziangh maengc wuov dauh.** Cuotv liuz kaux yie, maiv maaih haaix dauh haih mingh duqv taux Zangc Diex wuov; 1 Cor. 15:45 *Weic zuqc Ging-Sou gorngv, "Daauh dauh mienh se Aa[^]ndam, ninh yaac maaih maengc ziangh jienv."* Mv

baac nqa'haav wuov dauh Aa^ndam se bun mienh maaih maengc ziangh jienv wuov dauh)

C. Yietc Liuz Nyei Maengc

1. **Yesu bun Yietc Liuz nyei Maengc (Yo^han 10:27-28** *Yie nyei ba'gi yungh muangx yie nyei qiex. Yie yaac hiuv duqv ninh mbuo, ninh mbuo yaac gan jienv yie mingh. 28 Yie bun ninh mbuo maaih yietc liuz nyei maengc, yietc liuz maivzuqc daic. Ninh mbuo yiem yie nyei buoz, maiv maaih haaix dauh haih caangv duqv cuotv.)*
2. 2, “*Tin-Hungh ndongc naaic hnamv lungh ndiev mienh cingx zorqv ninh nyei ndoqc Dorn ceix bun ninh mbuo. Haaix dauh sienx kaux Tin-Hungh nyei Dorn maiv zuqc mietc mv baac duqv yietc liuz nyei maengc (Yo^han 3:16)*

Dorh ging-sou nyei eix-leiz daaih longc yiem maengc:

1. Hnangv haaix nor goux maengc. Maiv dungx baac-baac daix mienh, yaac maiv daix ganh, goux maiv gaengc cuotv nyei gu'nguaaz.
2. Maiv dungx nzornng ganh nyei gorx-youz, weic zuqc “*Haaix dauh nzornng ninh nyei gorx-youz, wuov dauh se daix mienh nyei mienh. Meih mbuo yaac hiuv duqv daix mienh nyei mienh” I Yo^han 3:15*
3. Goux Yietc liuz nyei maengc...gengh zuqc hiuv dingc gorngv mbuo nyei fu'jueiv gengh sienx Yesu...duqv yietc liuz nyei maengc.
4. Se gorngv meih ginv Yesu se ginv maengc, ginv daic se ginv Sadaan.
5. I^saa^laa^en mienh duqv bieqc Tin-Hungh laengz nyei deic bung, Mose mbuox ninh mbuoyiem **Nzamec Leiz-latc 30:15-20 15** “*Mangc maah! Yie ih hnoi bun meih mbuo maaih qangx ginv oix maaih maengc ziangh fai daic, duqv longx fai duqv ciouv. 16 Se gorngv meih mbuo ei jienv Ziouv, meih mbuo nyei Tin-Hungh nyei waac, dongh yie ih hnoi hatc meih mbuo nyei waac, hnamv Ziouv, meih mbuo nyei Tin-Hungh, yangh ninh nyei doz, gan longx ninh nyei leiz-latc caux lingc caux leiz, meih mbuo ziouc duqv ziangh jienv yaac hiaangx jienv faaux. Meih mbuo duqv bieqc mingh yiem jienv oix benx meih mbuo nyei buonc wuov norm deic-bung wuov zanc, Ziouv, meih mbuo nyei Tin-Hungh, oix ceix fuqv bun meih mbuo. 17 Mv baac se gorngv meih mbuo hnyouv ngaengc, maiv kangv muangx Ziouv, ziouc zuqc nduov mingh fuh sux zangc ganh nyungc zienh, 18 ih hnoi yie mengh mengh nyei zunh mbuox meih mbuo, meih mbuo ndongc haaix zungv oix zuqc mietc. Meih mbuo jiox Jor^ndaen Ndaaih bieqc oix benx meih mbuo nyei buonc wuov norm deic-bung meih mbuo maiv duqv ziangh lauh. 19 yie bun meih mbuo maaih qangx ginv oix ziangh fai daic, oix duqv fuqv fai zuqc zioux. Ih zanc oix zuqc ginv meih mbuo oix duqv ziangh jienv weic bun meih mbuo nyei zeiv-fun haih duqv ziangh jienv, 20 yaac hnamv Ziouv, meih mbuo nyei Tin-Hungh, muangx ninh nyei waac, kaux wuonv ninh. Hnangv naaic, meih mbuo caux meih mbuo nyei zeiv-fun duqv ziangh siouc nyuonh ndaavv yiem Ziouv houv jienv oix bun meih mbuo nyei ong-taaix, Apc^laa^ham, Isakc caux Yaakopv wuov norm deic-bung.*

7. HOC-DAUH: Oix Zuqc Zoux Cing-Nzengc Da'cietv diuh lingc

Doqc Ging-Sou Yiem: Cuotvⁱ^yipv 20:14 “Maiv dungx hienx auv hienx nqox”

Matv^{tai} 5:27-30 “Meih mbuo haiz jiex loz-hnoi njaaux mienh naaiv deix waac, ‘Maiv dungx hienx auv hienx nqox.’ 28 Mv baac ih zanc yie mbuox meih mbuo, haaix dauh buatac dauh m'sieqv dorn yaac haiz hanc, se dorngx yiem hnyouv hienx liuz aqv. 29 Hnangv naaic, se gorngv meih nyei mbiaauc bung m'zing nduov meih zoux zuiz, oix zuqc gueix guangc. Meih nyei sin waaic fangx corc gauh longx jiex meih nyei ziangh sin zuqc ndortv deic nyuoqc”

Matv^{tai} 19:18 (Butv zoih mienh lunx mienh naaic: yie oix zuqc hnangv haaix nor zoux cingx duqv yietc liuz nyei maengc?) Yesu gorngv, Se gorngv meih oix duqv yietc liuz nyei maengc, oix zuqc ei jienv leiz-latec zoux.” Wuov dauh naaic, “Haaix deix leiz-latec?” Yesu dau, “Maiv dungx daix mienh, maiv dungx hienx auv, maiv dungx zoux zaqc yaac maiv dungx zoux jaav zorng-zengx.

1 Ko^{lin}^{to}. 10:6,8 (longc I^{saa}^{laa}^{en} nyungc zeiv donv ih jaax hnoi nyei mienh) “Naaiv deix sic yietc zungv zoux nyungc zeiv donv mbuo, maiv bun mbuo maaih hnyouv oix zoux waaic sic hnangv ninh mbuo zoux nor. 8 Mbuo maiv dungx zoux maiv luonx horngc nyei sic hnangv ninh mbuo maaih deix mienh zoux nor, cingx daaih yietc hnoi hnangv maaih i waanc buo cin dauh mienh zuqc daic.”

Ko^{lo}^{si}. 3:5 Weic naaiv oix zuqc mietc nzengc meih mbuo nyei sin zangc hanc oix zoux nyei nyungc-nyungc waaic sic. Oix zuqc guangc nziaauc sieqv nziaauc dorn nyei sic, maiv cing-nzengc nyei, maiv luonx horngc nyei, maaih hnyouv zoux waaic nyei, mauv ga'naaiv nyei sic. (Mauv ga'naaiv se hnangv baaix miuh fangx nor.)

1 Te^{saa}^{lo}ⁿⁱ^{gaa}. 4:3 Tin-Hungh nyei eix se hnangv naaiv: Ninh oix meih mbuo zoux cing-nzengc, simv nqoi nziaauc sieqv nziaauc dorn nyei sic.

Gorngv Jiex gorn nyei waac:

Da'cietv wuov diuh lingc “Maiv dungx hienx auv hienx nqox” mbuox mbuo sienx Giduc nyei mienh taux Tin-Hungh nyei eix se oix dauh dauh zoux cing-nzengc nyei mienh. Cuotv liuz meih caux meih ganh nyei auv/nqox bueix: ga'nyiec nyei se benx hienx. Ndaangc dorng jaa fai dorng liuz jaa zoux nyei se benx zuiz doix-dekc Tin-Hungh. Yiem loz-ngaengc waac dongh zoux cuotv nyei se dorngc, yiem siang-ngaengc waac hnamv cuotv hnangv yaac dorngc. Yiem Matv^{tai} 5:27-28 gorngv taux hnyouv hanc caux zoux cuotv nyei sic. Tin-Hungh nyei eix se oix sienx ninh nyei mienh zoux cing-nzengc (1 Te^{saa}^{lo}ⁿⁱ^{gaa} 4:3-7).

Porv mengh ging-sou:

Doqc Tin-deic douh 2:21-24 Ziouv Tin-Hungh ziouc bun wuov dauh mienh bueix m'njormh ndo nyei. M'njormh wuov zanc, ninh zorqv diuh wuov dauh mienh nyei la'saengx mbungv aengx bun orv ziangh ndipc mi'aqv. 22 Ziouv Tin-Hungh longc yiem m'jangc dorn zorqv cuotv wuov diuh la'saengx mbungv zoux benx dauh m'sieqv dorn,

aengx dorh daaih taux m'jangc dorn wuov. 23 Wuov dauh m'jangc dorn ziouc gorngv, “Dongh naaiv aqv. Mbungv yaac yie nyei mbungv benx daaih. Orv yaac yie nyei orv benx daaih. Oix zuqc tengx ninh cuotv mbuox heuc m'sieqv dorn, weic zuqc ninh yiem m'jangc dorn cuotv daaih.” 24 Weic naaiv m'jangc dorn dorng jaa, leih ninh nyei diex maac, caux jienv ninh nyei auv benx yietc dauh mi'aqv.”

A. Dorng jaa nyei jienv: auv caux nqox

1. Jienv yiem dorng jaa: Leih ninh nyei diex maa caux ninh nyei auv benx yietc dauh (Tin-deic douh. 2:24 *Weic naaiv m'jangc dorn dorng jaa, leih ninh nyei diex maac, caux jienv ninh nyei auv **benx yietc dauh** mi'aqv*) Cuotv liuz Tin-Hungh, meih nyei auv/nqox zoux da'nyeic jienv jiex nyei. Yiem Ad^ndam caux Haa^waa mbuo hoqc duqv camv nyungc nyei:
2. Tin-Hungh ganh liepc dorng jaa, maiv zeiz baamh mienh, weic naaiv Ziouv nyei waac oix zuqc gunv dorng jaa mienh (Tin-deic douh 2:22-24)
3. Dorng jaa se yietc dauh m'jangc longc yietc dauh m'sieqv (Tin-Hungh bun yietc dauh auv Aa^ndam hngv)
4. Zoux nqox nyei mienh zoux auv nyei m'nqorngv weic zuqc Tin-Hungh zeix Aa^ndam ndangc ninh zeix Haa^waa (1 Ko^lin^to 11:8-9; 1 Ti^mo^tai 2:13) Tin-Hungh zeix Haa^waa daaih tengx Aa^ndam

B. Dorng Jaa se yietc seix yiem naaiv baamh gen

1. *Caux jienv ninh nyei auv **benx yietc dauh** mi'aqv* (gapv, nitv doic). Yiem **Maa^laa^ki sou 2:16** *Ziouv Tin-Hungh gorngv, yie nouz haic leih cai-doix nyei jauv, yaac nzorng mienh zeix ganh nyei auv.*”
2. Dorng jaa se yietc seix yiem ziangh jienv nyei ziangh hoc. **Maako 10:9** “*Weic naaiv, Tin-Hungh gapv daaih nyei cai-doix, mienh maiv dungx caeqv nqoi.*” Yiem loz ngaengc waac mienh leih cai-doix weic hnyouv ngaengc maiv muangx Tin-Hungh nyei waac, mbuo maiv dungx zuotc ninh mbuo fai dorh ninh mbuo daaih zoux nyungc zeiv.
3. Doix-doix mienh maaih maiv horpc nyei sic nyei mv baac oix zuqc ziepc zuoqv lanh hnyouv ndaaub bun lanh

C. Weic haaix nyungc hienx auv hienx nqox benx zuiz hniv haic?

1. **Hienx auv hienx nqox se zoux zuiz dorngc Tin-Hungh. (Cuotv^i^yipv 20:14** *Maiv dungx hienx auv, hienx nqox*”
 - **1 Ko^lin^to 6:9-10** “*Meih mbuo maiv hiuv fai? Zoux waaic sic nyei mienh maiv duqv yiem Tin-Hungh nyei guoqv. Maiv dungx nduov ganh oc. Da'faanh zoux maiv luonx horngc nyei sic, baaix miuc-fangx, hienx auv hienx nqox, baamz dongh So^ndom Zingh nyei mienh baamz wuov nyungc zuiz, 10 luv mienh, mauv ga'naaiv, hopv diuv nquin, gorngv doqc mienh fai zoux zaqc, naaiv nyungc mienh maiv duqv yiem Tin-Hungh nyei guoqv.*”
 - **E^fe^so 5:5** *Meih mbuo oix zuqc hiuv dingc, haaix dauh nziaauc sieqv nziaauc dorn, fai zoux maiv cing-nzengc nyei sic, fai mauv ga'naaiv, (weic zuqc mauv ga'naaiv se dorngx baaix miuc-fangx) wuov dauh yietc liuz zungv maiv maaih buonc yiem Tin-Hungh*

• **Doqc Laauc Yaangh 21:8**

2. **Hienx auv hienx nqox zoux zuiz dornge ganh nyei sin (1 Ko[^]lin[^]to 6:18-19**
Oix zuqc simv nqoi nziaauc sieqv nziaauc dorn nyei sic. Mienh baamz nyei haaix nyungc zuiz se hoic maiv zuqc sin. Mv baac nziaauc sieqv nziaauc dorn nyei zuiz se hoic ganh nyei sin. 19 Meih mbuo maiv hiuv fai? Meih mbuo nyei sin se Singx Lingh nyei dinc. Tin-Hungh bun daaih nyei Singx Lingh yiem meih mbuo gu'nyuoz. Meih mbuo nyei sin se maiv zeiz meih mbuo ganh nyei, se Tin-Hungh nyei,
3. **Hienx auv hienx nqox zoux zuiz dornge hmuangv doic**
4. **Hienx auv hienx nqox zoux zuiz dornge jiu-baang** (Lomaa 14:7; 1 Ko[^]lin[^]to 3:16-17)
5. **Hienx auv hienx nqox zoux zuiz dornge mienh** (Cong-mengh 14:34; Nzamc leiz-latc 22:22)

Dorh ging-sou nyei eix-leiz daaih longc yiem maengc:

1 Te[^]saa[^]lo[^]ni[^]gaa 4:3 Tin-Hungh nyei eix se hngangv naaiv. Ninh oix meih mbuo zoux cing-nzengc, simv nqoi nziaauc sieqv nziaauc dorn nyei sic. Weic naaiv ninh cingx daaih gorngv heuc mbuo maiv dungx hienx auv, hienx nqox. Maiv daan gengh longc sin hienx hngangv hnyouv yaac maiv horpc zuqc hienx (fai hanc) fih hngangv. Weic zuqc hienx auv hienx nqox nyei mienh se biux mengh gorngv ninh mbuo maiv gaengc hiuv duqv Tin-Hungh, yaac maiv duqv yiem ninh nyei guoqv.

8. HOC-DAUH: Zoux “Zaqc fai Zingx” Nyei Mienh
Da’betv diuh lingc

Doqc Ging-Sou Yiem: Cuotv[^]i[^]yipv 20:15“Maiv dungx zoux zaqc”; **E[^]fe[^]so 4:28** “Zinh ndaangc zoux zaqc nimc ga’naaiv wuov deix oix zuqc guangc, maiv dungx aengx nimc. Daaux nzuonx oix zuqc longc ganh nyei buoz zoux maaih lamh longc nyei gong yungz ganh nyei maengc yaac nzie mienh jomc mienh.”

Gorngv Jiex gorn nyei waac:

“Maiv dungx zoux zaqc”: Zoux zaqc nyei mienh zorqv maiv zeiz ninh mbuo nyei ga’naaiv, fai maiv bun horpc zuqc bun nyei ga’naaiv. E[^]fe[^]so 4:28 tengx porv naaiv diuh lingc bun mbuo bieqc hnyouv. “Zinh ndaangc zoux zaqc nimc ga’naaiv wuov deix oix zuqc guangc, maiv dungx aengx nimc. Daaux nzuonx oix zuqc longc ganh nyei buoz zoux maaih lamh longc nyei gong yungz ganh nyei maengc yaac nzie mienh jomc mienh.”

Mbuo haih hoqc duqv buo nyungc yiem naaiv yienc ging-sou: **Da’yietv** nyungc se, mbuo oix zuqc benx **ZINGX** nyei mienh; “Zinh ndaangc zoux zaqc nimc ga’naaiv wuov deix oix zuqc guangc, maiv dungx aengx nimc” **Da’nyeic** nyungc se, mbuo oix zuqc benx **JIENH** nyei mienh: “Daaux nzuonx oix zuqc longc ganh nyei buoz zoux maaih lamh longc nyei gong yungz ganh nyei maengc.” **Da’faam** nyungc se, mbuo oix zuqc zoux hnyouv **JANGV**, “yaac nzie mienh jomc mienh.”

Porv mengh ging-sou nyei waac:

A. Benx Zingx Nyei Mienh nyei eix-leiz

1. **Nimc mienh nyei ga'naaiv:** Buo diuc jauv bun mbuo haih duqv ga'naaiv yiem mbuo nyei maengc: 1. Mienh bun nyei **Zingh Nyeic Fai En zingh.** (Njoux en, fai mienh bun weic ninh mbuo hnamv mbuo). 2. **Zoux Gong bietv** (longc mbuo nyei qaqv/ziangh hoc tiuv dongh mbuo oix duqv nyei). 3. **Nimc/zoux zaqc zorqv mienh nyei** (zoux zuiz, ndortv mienh tongx nimc, ndortv mienh bungx laangc, zuqc mieh mangc piex... zoux zaqc nimc ga'naaiv nyei mienh maiv buangv hnyouv nyei mienh...nimc jiex gorn oix nimc gauh camv jienv mingh... Nyungc Zeiv: Maaih dauh niouv taxi nyei mienh zorqv ninh nyei la'fapv hnoi-hnoi dapv jienv mbuoqc, liuz aan jienv nqa'haav mienh zueix nyei dorngx. Hnoi-hnoi, naaiv norm la'fapv mbuoqc zungv dingx laaih...nimc wuov lanh mienh gengh m'zing hlo aqv weic zuqc ninh nimc duqv mbuoqc la'fapv.
2. **Mengh Zaqc Nimc ga'naaiv** (nimc yiem huoz-biauv, biauv, zoux gong dorngx) Meih hnavg haaix nor hnamv se gorngv mienh nimc meih nyei ga'naaiv? Qiex jiez...nyiemv...mbuoqc horngh! Zoux zaqc nyei gorn se Sadaan (Yo^han 10:10) Weic haaix nyungc zoux zaqc nimc ga'naaiv se zuiz? Weic zuqc Tin-Hungh zeix baamh mienh maaih ninh nyei fangc zeiv, se gorngv meih nimc mienh nyei ga'naaiv meih yaac nimc Tin-Hungh nyei ga'naaiv aqv.
3. **Pienx/Maiv ziepc zuoqv zoux gong** (Ko^lo^si 3:22)
4. **Ndouv zinh maaiz hueix:** benx zuiz, maiv maaih haaix dauh hingh se gorngv maiv maaih yietc dauh ndortv. Ndouv caux maaiz hueix se zoux zaqc...se gorngv mienh zorqv congx ziangv jienv meih zorqv meih nyei nyaanh nor se luv, nimc; mv baac se gorngv meih zorqv meih nyei nyaanh yiem ndouv zinh dorngx se ndouv zinh.
5. **Mienh nimc Tin-Hungh nyei ga'naaiv** weic maiv fongc horc ziepc gouv nyei yietc gouv (Maa^laa^ki 3:8, 9). Meih mbuo nimc Tin-Hungh se gorngv meih mbuo maiv bun ninh meih mbuo nyei maengc **1 Ko^lin^to 6:19-20-19** *Meih mbuo maiv hiuv fai? Meih mbuo nyei sin se Singx Lingh nyei dinc. Tin-Hungh bun daaih nyei Singx Lingh yiem meih mbuo gu'nyuoz. Meih mbuo nyei sin se maiv zeiz meih mbuo ganh nyei, se Tin-Hungh nyei, 20 weic zuqc Tin-Hungh maaiz meih mbuo jaaix haic. Hnavg naaic meih mbuo oix zuqc longc meih mbuo nyei sin taaih Tin-Hungh. Maa^laa^ki 3:8-14 gorngv, mbuo pienx, mbuo nimc Tin-Hungh nyei se gorngv mbuo maiv fongc horc bun Tin-Hungh). Maiv gunv maaih zoqc fai camv maiv longc jienv, longc jienv mbuo zieqv duqv nyungc-nyungc mbuo maaih nyei se Tin-Hungh nyei.*
6. Zoux zaqc bun lanh caux lanh maiv haih jiu tong, yaac bun mbuo caux Tin-Hungh maiv haih jiu tong. Buo diuc jauv dongh mbuo haih duqv ga'naaiv yiem mbuo nyei maengc: 1. Mienh bun nyei **Zingh Nyeic Fai En zingh.** 2. **Zoux Gong bietv** (longc mbuo nyei qaqv). 3. **Nimc/zoux zaqc zorqv mienh nyei.** Da^yietv caux da'nyeic diuc se horpc Tin-Hungh nyei hnyouv,

Da'faam diuc se zuiz. Zoux zaqc mienh hoic zuqc ganh.

B. Benx Jienh Nyei Mienh

1. Zoux gong nyei fuqv (**2 Te[^]saa[^]lo[^]ni[^]gaa 3:10** Yie mbuo caux meih mbuo yiem wuov zanc yie mbuo mbuox meih mbuo, “Se gorngv haaix dauh maiv kangv zoux gong, maiv dungx bun ninh nyanc hnaangx.”)
2. Tin-Hungh zeix da'yietv dauh mienh daaih bun ninh zoux gong (Tin-deic douh 2:15 Ziouv Tin-Hungh ziouc bun ninh zeix daaih wuov laanh mienh yiem E[^]nden Huingx, bun ninh fioux yaac goux jienv)
3. Zoux gong nyei zinh (*Naanc Zingh Nzung 3:27 “za'gengh longx nyei bun mienh se gorngv ninh lunx nyei yaac zoux gong”*)

C. Benx Hnyouv Jangv Nyei Mienh

1. Tengx mienh jomc mienh (**Gong-zoh 20:33-35 33** *Yie yaac maiv mauv jiex haaix dauh nyei jiem nyaanh fai lui-houx. 34 Meih mbuo hiuv duqv yie longc yie ganh nyei buoz weic duqv yie aengx caux yie yiem nyei mienh qiemx longc nyei ga'naaiv. 35 Yie zoux nyei nyungc-nyungc se zoux nyungc zeiv bun meih mbuo hiuv duqv oix zuqc hnavg naaiv nor zoux gong kouv weic tengx mau nyei mienh. Jangx jienv Ziouv Yesu gorngv nyei waac. Ninh gorngv, ‘Bun nyei gauh maaih orn-lorqc duqv zipv nyei.’*)
2. Yiem naaiv lungh ndiev maaih i nyungc mienh: maaih nyungc mienh hnyouv ndaav kungx bun, maaih nyungc mienh kungx zorqv/zipv hnavg. Meih benx haaix nyungc mienh?
3. Bun meih nyei maengc Tin-Hungh (**Maako 8:35 35** *Haaix dauh kungx hnamv njoux ninh ganh nyei maengc hnavg, wuov dauh nyei maengc ziouc zuqc guangc. Mv baac haaix dauh weic yie yaac weic kuv fiengx guangc ninh nyei maengc, wuov dauh ziouc njoux duqv ninh nyei maengc*)

Dorh ging-sou nyei eix-leiz daaih longc yiem maengc:

1. Haaix nyungc maiv zeix meih mbuo meih zorqv nyei fai?
2. Haaix nyungc horpc zuqc bun mv baac meih maiv bun nyei fai?
3. Sienx Tin-Hungh maiv horpc zoux zaqc nimc ga'naaiv, horpc zoux zingx nyei yiem maengc hnavg. Meih nimc mienh nyei ga'naaiv nyei fai? Meih nimc Tin-Hungh nyei fai?
4. Meih a'hneiv nyei zoux gong nyei fai? Meih zieqv duqv yaac buatc Tin-Hungh nyei fuqv yiem meih nyei maengc nyei fai? Tin-hungh ceix fuqv meih weic bun meih haih ceix fuqv bun ganh dauh. Hnavg wuov diuh nzung gorngv nor, mbuo se wuom nyei ginv hnavg, bun Tin-Hungh nyei fuqv liouc mingh taux ganh dauh.

9. HOC-DAUH: Oix zuqc gorngv zien

Da'juov diuh lingc

Doqc ging-sou: Cuotv[^]i[^]yipv 20:16 “*Maiv dungx zoux jaav zorn-gengx hoic mienh*”; *Yo[^]han 8:44; 14:6; Nzamc Leiz-latc. 19:15-19*

Gorngv Jiex gorn nyei waac:

“**Maiv dungx zoux jaav zornng-zengx hoic mienh**” Zoux jaav-zornng-zengx yaac maaih eix-leiz gorngv, “maiv dungx gorngv-baeqc” Naaiv diuh leiz njaaux mbuo oix zuqc gorngv zien. Se gorngv lunggh ndiev zuqc kouv se gorngv dauh-dauh maiv gorngv zien.

Weic zuqc maaih mienh camv gorngv baeqc, maaih mienh laic duqv gorngv-baeqc se maiv benx haaix nyungc. **Nyungc-zeiv:** Maaih norm hnoi gengh nzueic nyei hnoi, maaih bei dauh horqc saeng, niouv cie mingh nziaauc gor zaaih mingh. Taux horngc wuov, njaaux sou wuov dauh naaic, ninh mbuo yietv zungv gorngv ninh mbuo nyei cie yienh huv...Njaaux sou wuov dauh maiv ko^lo nyei, liuz ziouc gorngv mbuox ninh mbuo yietc dauh zueiz yietc norm gorqv. Ninh ziouc heuc ninh mbuo dau, “Dongh haaix norm cie-yienh huv?” --- “Mbuo sienx Yesu nyei mienh niv? Mbuo oix zuqc gorngv zien weic mbuo hnamv Ziouv (E^fe^so. 4:15).

Porv mengh ging-sou:

A. Zoux jaav zorngh zengx

1. Jaav zorngh zengx/gorngv baeqc nyei nyei gorn: Sadaan (**Yo^han 8:44** *Meih mbuo nyei die se mienv nyei hungh. Meih mbuo kungx oix ei jienv meih mbuo nyei die nyei eix zoux hnangv. Yiem gorn wuov ninh m'daaiah daix mienh. Ninh yietc liuz maiv a'hneiv zien leiz, weic zuqc yiem ninh ganh maiv maaih zien leiz. **Ninh gorngv-baeqc weic zuqc ninh ei ninh ganh nyei fiem-fingx m'daaiah gorngv-baeqc. Ninh kungx gorngv-baeqc hnangv yaac zoux gorngv-baeqc nyei die***)
2. Nzunc-nzunc mbuo mengh zaqc **gorngv baeqc** (zorqv zien nyei goiv/pienx gorngv benx dongh maiv zien nyei) Mbuo se zoux ei mienv, naaiv se benx zuiz.
3. Daanh Mienh/ gorngv doqc zoux bun mienh nyei mengh daauh ndortv/Hnangv Sadaan zoux bun Tin-Hungh nor...**Tin-deic douh 3:4-5** “*Naang gorngv mbuox m'sieqv dorn, “Meih mbuo maiv daic lorqc. 5 Tin-Hungh hnangv naaiv nor gorngv weic zuqc ninh hiuv duqv meih mbuo nyanc liuz, meih mbuo haih hnamv duqv tong, yaac hnangv ninh nor, haih hiuv duqv longx hiuv duqv waaic.”;* **Matv^tai 4:1-11** Yesu zuqc mienv nyei hungh seix...doqc)
4. Zunh gorngv jienv waac huv mingh (**Cuotv^i^yipv 23:1-2** “*Maiv dungx dorh jaav waac mingh zunh mbuox mienh. Maiv dungx caux mienh waaic mienh dongh hnyouv zoux zornng-zengx hoic mienh. 2 “Maiv dungx gan mienh camv zoux waaic sic. Gorngv sic nyei ziangh hoc maiv dungx gan mienh camv zoux jaav zornng-zengx bun baengh fim nyei leiz pien.”*)
5. **Gorngv huangv**/zien deix nyei mv baac jaa gorngv camv deix
6. **La'guaih ceng fai maiv horpc zuqc ceng nyei** (cong-mengh 26:28; Singx Nzung 55:21)
7. **Hiuv duqv zien leiz mv baac maiv ko^lo** (**Lewi 5:1** “*Se gorngv mienh heuc dauh mienh mingh zoux zornng-zengx ziux ninh buatac nyei hiuv nyei mv baac ninh maiv kangv zoux zornng-zengx, ninh maaih zuiz aqv. Ninh ganh oix zuqc ndaam-dorng.*)
8. Zoux jaav zorngh zengx fai gorngv baeqc nyei mienh zuqc Ziouv nzornng (cong-mengh. 6:17,19), zuqc ndortv deic nyuoqc (**Lauc yaangh. 21:8** *Mv baac daamv faix wuov deix, maiv sienx nyei wuov deix, zoux maiv luonx horngc maiv cing-nzengc nyei sic, daix mienh, nziaauc sieqv nziaauc dorn, zoux faatv, baaix miuc-*

mienv caux yietc zungv gorngv-baeqc nyei mienh, ninh mbuo nyei buonc se yiem zieqc jienv hungh nyei douz-koiv gu'nyuoz. Naaiv se zuqc daic nyei da'nyeic baan)

B. Zoux zien zorngh zengx

1. Zien nyei gorn nyuonh: Yesu Giduc (**Yo^han 5:33;14:6** Yie se zien jauv, zien leiz...; Yo^han 17:17 *Tov Die longc meih nyei zien leiz bun ninh mbuo cing-nzengc daaih. Meih nyei doz se zien leiz*)
2. Mbuo zuangv Yesu se gorngv mbuo gorngv zien. (**Yo^han 8:47** *Haaix dauh yiem Tin-Hungh daaih, wuov dauh zungv oix muangx Tin-Hungh nyei waac. Meih mbuo maiv zeiz yiem Tin-Hungh daaih cingx daaih maiv muangx ninh nyei waac*)
3. **Bun nzanx weic zien leiz gauh yaauc weic juangc jienv mv baac dornge.** (E^fe^so 4:3 ; Amo 3:3)
4. **Gorngv zien mv baac mun, se gauh yaauc gorngv-baeqc mv baac orn nduov, weic gorngv-baeqc liuz zuqc daic** (400 dauh douc waac mienh gorngv- baeqc nduov Ahab; Kungx Mikaah gorngv zien, zuqc Ahab nzorngh. Liuz, Ahab zuqc daic weic ninh muangx wuov deix 400 dauh gorngv-baeqc. Se gorngv ninh muangx zien waac dongh zuqc ninh mun nyei wuov nor, ninh corc maiv gaengh zuqc daic).
5. **Gorngv zien leiz zuqc mienh nzorngh gauh yaauc gorngv-baeqc bun mienh hnamv:** Ahab gorngv “yie nzorngh haic ninh” weic Mikaah mbuox zien waac ninh. Baulo mbuox Gaa^laa^tie mienh, “Laaix yie gorngv zien leiz mbuox meih mbuo, ih zanc yie benx meih mbuo nyei win-wangv fai?” (Gaa^laa^tie 4:16) Yesu weic ninh gorngv zien leiz zuqc mienh daix ninh (Baamh mienh maiv maaih dornghx nzorngh meih mbuo mv baac ninh mbuo nzorngh yie, weic zuqc yie zoux zorngh-zengx gorngv ninh mbuo zoux nyei waaic sic (Yo^han 7:7)
6. **Caux Yietc lanh ganh souv wuonv weic zien leiz gauh yaauc yietc guanv souv pien leiz.** (400 dauh doix-dek 1 dauh Mikaah. Maaih ziex nzunc meih mbuo ganh nduqc dauh oix zuqc souv wuonv weic zien leiz....Yaac hnanv Noah nor...)
7. **Duqv hingh weic zien leiz yiem nqa'haav hingv gauh yaauc minc zinh duqv hingh weic gorngv-baeqc.** (Ahab mingh mborqv jaax, forng-cang zuqc ninh, Mikaah duqv Tin-Hungh nyei ningv...mbuo zuqc ei Ziouv nyei waac, weic zuqc kungx ninh ganh nyei waac, yietc doic jiex doic maiv goiv yientc. Mbuo oix zuqc hnanv Mikaah nor, “Tin-Hungh gorngv haaix nyungc mbuox yie, Yie ziouc gorngv.”

C. Jienv haic - zuqc gorngv zien:

1. **Gorngv zien yientc mbuo nyei maengc** (**Ko^lo^si 3:9-10** “*Laanh maiv dungx gorngv-baeqc nduov laanh, weic zuqc meih mbuo guangc meih mbuo nyei loz-maengc caux loz-maengc zoux nyei sic, 10 aengx duqv* siang-maengc.*”
2. **Gorngv zien tengx duqv mbuo** (**Fi^lipv^poi 4:8** – “*Yie nyei gorx-youz aac, yie aengx gorngv deix setv mueiz waac. Haaix nyungc zien nyei, horpc zuqc taaih nyei, baengh fim nyei, cing-nzengc nyei, horpc zuqc hnamv nyei, mengh*

dauh longx nyei, naaiv deix longx haic horpc zuqc ceng nyei yietc zungv oix zuqc zanz jienv hnyouv.”

3. **Gorngv zien bun mbuo zuangv Zangc Diex (Yo^han 14:6** – “*Yesu dau, “Yie se dongh mingh Tin-Hungh wuov diuh jauv, yaac dongh zien leiz, yaac dongh ziangh maengc wuov dauh. Cuotv liuz kaux yie, maiv maaih haaix dauh haih mingh duqv tauv Zangc Diex wuov.”*
4. **Gorngv zien haih bun lanh bungx hnyouv lanh**
5. **Gorngv zien tengx simv nqoi orqv sic**
6. **Gorngv zien bungz nqoi (Yo^han 8:32** – “. . . zien leiz bungz nqoi.”); gorngv-baeqc ndoh.

Dorh ging-sou nyei eix-leiz daaih longx yiem maengc:

1. Meih zoux nyei se zuangv mienv fai Tin-Hungh? Meih gorngv nyei waac zien nyei fai gorngv-baeqc?
2. Meih zanc-zanc gorngv-baeqc, gorngv doqc, gorngv waac huv, fai horpc zuqc gorngv zien nyei mv baac meih maiv ko-lo?
3. Gorngv-baeqc nyei mienh hoic zuqc ganh
4. Tin-Hungh se zien leiz nyei gorn, Yesu se zien leiz. Giduc mienh oix zuqc gorngv zien waac. Tov Tin-Hungh tengx jienv mbuo dauh dauh gorngv zien nyei waac. Weic zuqc, “*mouz dauh mienh gorngv nyei joux-joux henh waac, gorqc mienh ganh oix zuqc ndaam-dorng.” Matv^tai 12:36*
5. **Nzanc Leiz-latc 19:15-19** Zoux zorn-g-zengx nyei mienh “*Maiv gunv mienh baamz haaix nyungc zuiz fai zoux dorngc haaix nyungc sic, nduqc dauh mienh zoux zorn-g-zengx se maiv gauv dingc ninh nyei zuiz. Oix zuqc maaih i fai buo dauh zoux zorn-g-zengx cingx dingc. 16 Se gorngv maaih dauh mienh zoux jaav zorn-g-zengx oix hoic mienh, 17 naaiv deix i dauh maaih sic nyei mienh oix zuqc mingh yiem Ziouv nyei nza'hmien, dorng jienv dongh wuov zanc zoux sai mienh nyei gong nyei sai mienh caux siemv zuiz jien. 18 Siemv zuiz jien ziouc longx-longx nyei zaah muonc ninh mbuo nyei sic. Se gorngv zaah cuotv zorn-g-zengx mienh gorngv-baeqc, zoux jaav zorn-g-zengx hoic ninh nyei gorx-youz, 19 oix zuqc zoux bun ninh hnanv ninh jiez hnyouv zoux bun ninh nyei gorx-youz nor. Oix zuqc bun naaiv deix orqv sic yiem meih mbuo mbu'ndongx zutc nzengc. 20 Zuangx mienh haiz naaiv deix sic ziouc gamh nziex haic. Yiem meih mbuo mbu'ndongx yietc liuz maiv maaih mienh gaamv zoux naaiv nyungc orqv sic. 21 Maiv dungx korh lienh naaiv nyungc mienh. Oix zuqc maengc jaauv maengc, m'zing jaauv m'zing, nyaah jaauv nyaah, buoz jaauv buoz, zaux jaauv zaux.”*

10. HOC-DAUH: Maiv Dungx Mueic Jieqv **Da'ziepc diuh lingc**

Doqc Ging-Sou Yiem: Cutov^i^yipv 20:17 “*Maiv dungx mueic jieqv mienh nyei jaa-dingh. Maiv dungx mueic jieqv mienh nyei auv, mienh nyei nouh gauv nouh beiz, mienh nyei ngongh fai lorh fai ninh maaih nyei haaix nyungc ga'naaiv.”*

Gorngv Jiex Gorn Nyei Waac:

Mueic jieqv wuov joux waac nyei eix-leiz se gorngv maaih hnyouv hanc oix dongh maiv zeiz meih nyei. Da'ziepc naaiv diuh lingc nzutv zunv yietc zungv lingc gorngv taux hnyouv nyei jauv. Wuov deix nduoh diuh se gorngv taux zoux cuotv nyei sic, naaiv diuh gorngv taux hnyouv, fiem-fingx, caux hanc nyei.

Maaih ga'naaiv se maiv dorngc, **Yiem Nzamc Leiz Latc 8:18** “ *Oix zuqc jangx jienv Ziouv, meih mbuo nyei Tin-Hungh, bun meih mbuo maaih banh zeic hhangv naaiv nor butv zoih daaih, weic ziepc zuoqv nyei ei jienv ninh caux meih mbuo nyei ong-taaix houv jienv liepc nyei ngaengc waac hhangv ih hnoi nor.*” **Yaagorpc 1:17** “*Yietc zungv longx nyei, dunh yunh nyei zingh nyeic yiem tin-dorngv njiec daaih. Se Tin-Hungh, dongh zeix cuotv lungh nyei nyungc-nyungc njang wuov dauh, ceix bun mbuo. Ninh yietc liuz maiv goiv yienc, yaac maiv torngv zuqc haaix nyungc hmuangx.*”

Mbuo maiv zeiz gorngv taux maaih ga'naaiv nyei jauv, mbuo gorngv nyei se mueic jieqv nyei hnyouv (maaih hnyouv hanc dongh maiv zeiz mbuo nyei).

Porv Mengh Ging-Sou:

A. Weic haaix nyungc mienh mueic jieqv:

1. Maiv maaih mienh oix nyiemc gorngv ninh mbuo mueic jieqv mienh nyei ga'naaiv. Mv baac se gorngv meih jiex gorn mueic jieqv mienh nor aqc duqv yienc nyei. Mueic jieqv se maiv daan gorngv ga'naaiv hhangv, mengh daauh, zinh zoih, cong-mengh, nyungc-nyungc mienh maaih nyei.
2. Baulo nyei nyungc zeiv...da'yietv mingh taux da'juov se maiv aqc bun Baulo, mv baac da'ziepc wuov diuh (**Lomaa 7:7 Leiz-latc bun mienh hiuv duqv zuiz:** Wuov nyungc mbuo oix zuqc hhangv haaix nor gorngv? Leiz-latc ganh baamz zuiz fai? Zungv maiv zeiz! Mv baac laaix leiz-latc yie cingx daaih hiuv duqv zuiz hhangv haaix nor. Se gorngv leiz-latc maiv gorngv, “*Maiv dungx mauv ga'naaiv/mueic jieqv*”, *yie maiv hiuv duqv mauv ga'naaiv hhangv haaix nor*)
3. **Maa^ko 7:21-23** “*Weic zuqc mienh yiem hnyouv gu'nyuoz hnamv cuotv waaic sic, nziaauc sieqv nziaauc dorn, zoux zaqc, daix mienh, hienx auv hienx ngox, mauv ga'naaiv, zoux nyungc-nyungc waaic sic, nduov mienh, maiv luonx horngc, mueic jieqv, gorngv waac-huv, ceng-hlo, maiv gunv zinh hoz. Naaiv deix yietc zungv waaic sic se yiem mienh nyei hnyouv hnamv cuotv daaih bun mienh maaih uix*”
4. **Mueic jieqv nyei hoic (1 Ti^mo^tai 6:6-10 Zien butv-zoih mienh:** “*Haaix dauh gan longx Tin-Hungh yaac buangv hnyouv ninh maaih nyei, wuov dauh za'gengh butv zoih. 7 Mbuo cuotv seix, maiv dorh haaix nyungc bieqc baamh gen. Mbuo nzuonx seix yaac maiv haih dorh haaix nyungc cuotv. 8 Hhangv naaic, da'faanh mbuo maaih nyanc maaih hopv, maaih lui-houx zuqv, oix zuqc buangv hnyouv aqv. 9 Mv baac mauv oix butv zoih wuov deix mienh zuqc nduov baamz zuiz, zuqc koux hlopv jienv. Ninh mbuo nyei hnyouv hanc dorh ninh mbuo ei camv-nyungc hngongx haic, haih hoic mienh nyei za'eix, ninh mbuo ziouc zuqc ndortv nzengc, qui nzengc. 10 Weic zuqc mauv zinh mauv nyaanh se nyungc-*”

nyungc orqv sic nyei gorn. Laaix mauv zinh nyaanh maaih deix mienh leih ninh mbuo sienx nyei jauv ziouc zoux bun ganh zuqc nzauh camv hngangv maaih nzuqc baqv jienv mba'nziu nor."

Zien nyei, deix baav yiem meih nyei maengc meih maiv zangc ganh dauh zienh, maiv weic ganh zoux miuh faangx daaih zangc, maiv la'guaih longc Ziouv nyei mbuox, meih daaih hitv kuonx yiem Yesu Giduc, meih tongx nimc meih nyei diex maac, meih maiv daix mienh, maiv hienx auv hienx nqox, maiv zoux zaqc, maiv zoux jaav zorngh zengx (naaiv deix yietc zungv mange duqv buatec nyei sic). Yie oix naaic gaax meih...Meih mueic jieqv nyei fai? Mueic jieqv se mange maiv buatec yiem hnyouv nyei sic....

B. Hngangv haaix nor zorc mueic jieqv nyei hnyouv

1. Buangv hnyouv meih mbuo maaih nyei (**Hipv^lu 13:5**. *Maiv dungx bun mauv nyaanh nyei jauv gunv meih mbuo nyei maengc. Meih mbuo maaih nyei, oix zuqc buangv hnyouv weic zuqc Tin-Hungh gorngv, "Yie yietc liuz maiv leih meih, yietc liuz yaac maiv guangc meih."*)
2. Laengz zingh Tin-Hungh dongh meih maaih nyei nyungc-nyungc, yaac buangv hnyouv
 - a. Meih maaih Tin-Hungh dongh jienv jiex wuov dauh
 - b. Meih maaih hmuangv doic(Cong-mengh 18:22 "auv" Singx Nzung 127:3 "fu'jueiv")
 - c. Loz-hnoi Mienh gorngv, maaih fu'jueiv camv zoux mienh jomc" naaiv se maiv zeiz, Fu'jueiv zoux bun jomc nyei mienh butv zoih. Weic zuqc nduqc nyungc mbuo haih dorh jienv caux mbuo mingh Tin-dorngh se mbuo nyei sienx Tin-Hungh nyei fu'jueiv.
3. Buangv hnyouv yiem Yesu Giduc, Meih maiv haih buangv hnyouv taux meih maaih nyei liuz maiv mueiz jieqv mienh nyei, cuotv liuz meih bungz hnyouv yaac bungz laangc Tin-Hungh bun ninh goux meih.
4. Bun meih maaih nyei ga'naaiv mienh tengx meih maiv mueic jieqv mienh nyei ga'naaiv.

Dorh ging-sou nyei eix-leiz daaih longc yiem meangc:

Mbuo zoux dorngh Tin-Hungh nyei leiz biux mengh gorngv mbuo nyei hnyouv maaih sic. Weic Tin-Hungh bun qaqv caux banh zeic mbuo haih ei jienv ninh nyei za'eix zoux (Fi^lipv^poi 2:13)

Da'yietv diuh leiz-late, gorngv *cuotv liuz Ziouv maiv dungx zangc ganh dauh zienh*" biux mengh gorngv mbuo zuqc zangc nduqc dauh Tin-Hungh hngangv, maiv bun zangc zorpc, zangc ganh-nyungc zienh.

Da'nyeic wuov diuh leiz-late, gorngv, "*Maiv dungx weic ganh zoux haaix nyungc miuc-fangx.*" Biux mengh gorngv mbuo oix zuqc hngangv haaix nor buoqc zangc Tin-Hungh. Weic Tin-Hungh se doz, mbuo maiv maaih haaix nyungc haih dorh daaih beiv fai div duqv ninh, weic naaiv mbuo maiv dungx zangc miuc-fangx, longc buox zoux daaih nyei ga'naaiv.

Da'faam diuh leiz-late "*Maiv dungx la'guaih longc Ziouv, meih mbuo nyei Tin-*

Hungh nyei mbuox.” Biux mengh gorngv zangc Ziouv nyei mienh nyei eix oix zuqc hnungv haaix. Weic maiv bun la’guaih leangz, la’guaih gorngv, la’guaih longc Ziouv nyei mbuox.

Da’feix diuh leiz-lalc gorngv *dingh gong hnoi benx cing-nzengc nyei hnoi*. Tin-Hungh dingh gong weic mangc ninh zeix daaih nyei, I[^]saa[^]laa[^]en mienh dingh gong hitv kuonx benx laengz nyei ngaengc waac caux Tin-Hungh. Ih hnoi jiu-baang mienh dingh gong hitv kuonx yiem Yesu.

Da’hmz diuh leiz-lalc gorngv *oix zuqc tongx nimc mbuo nyei diex maac*, naaiv diuh lingc se da’yietv wuov diuh caux nduqc diuh lingc dongh maaih laengz nyei waac. Naaiv diuh lingc maaih i douc: da’yietv, gorngv taux fu’jueix hnungv haaix nor tongx nimc diex maac. Da’nyeic gorngv taux diex maac nyei mienh hnungv haaix nor zoux puix duqv ninh mbuo nyei fu’jueiv tongx nimc.

Da’luoqc diuh leiz-lalc gorngv *“maiv dungx daix mienh”*, weic Yesu se bun maengc gorn, mienv se mietc mienh nyei gorn. Naaiv yiemc ging-sou nyei eix-leiz se hatc maiv bun daix mienh, daix mienh dongh jiez hnyouv baac-baac daix wuov nyungc.

Da’cietv diuh leiz-lalc gorngv *“maiv dungx hienx auv hienx nqox”* mbuox mbuo sienx Giduc nyei mienh taux Tin-Hungh nyei eix se oix dauh dauh zoux cing-nzengc nyei mienh.

Da’betv diuh leiz-lalc gorngv, *“maiv dungx zoux zaqc”* njaaux taux buo nyungc yiem naaiv yiemc ging-sou. **Da’yietv** nyungc se, mbuo oix zuqc benx **ZINGX** nyei mienh; “Zinh ndaangc zoux zaqc nimc ga’naaiv wuov deix oix zuqc guangc, maiv dungx aengx nimc” **Da’nyeic** nyungc se, mbuo oix zuqc benx **JIENH** nyei mienh: “Daaux nzuonx oix zuqc longc ganh nyei buoz zoux maaih lamh longc nyei gong yungz ganh nyei maengc.” **Da’faam** nyungc se, mbuo oix zuqc zoux hnyouv **JANGV**, “yaac nzie mienh jomc mienh.”

Da’juov diuh leiz-lalc gorngv, *“Maiv dungx zoux jaav zornz-zengx hoic mienh”* Zoux jaav-zornz-zengx yaac maaih eix-leiz gorngv, “maiv dungx gorngv-baeqc”. Naaiv diuh leiz njaaux mbuo oix zuqc gorngv zien.

Da’ziepc diuh leiz-lalc gorngv, *Maiv dungx mueic jieqv mienh nyei jaa-dingh*. Buangv hnyouv meih mbuo maaih nyei.

Maaih ziepc diuh Ziouv nyei leiz (247nd nyei Qiex)
(Yauzsing Zoc Nyei Nzung)

Maaih ziepc diuh Ziouv nyei leiz, Tin-Hungh gorngv yie se Ziouv.
 Cuotv liuz yie Tin-Hungh maiv, dungx zangc ganh dauh zienh.
 Maiv dungx weic meih ganh zoux, haaix nyungc miuc-fangx, daaih zangc.
 Maiv dungx la' guaih longc Ziouv meih,
 mbuo nyei Tin-Hungh, nyei mbuox.

Nz: Heuc meih muangx ninh waac, heuc yie ei ninh waac.
 Ziouv Tin-Hungh gorngv nyei waac, meih caux yie zuqc ei.
 Ding gong hnoi benx norm, cing-nzengc hitv kuonx hnoi,
 ih hnoi mbuo daaih hitv kuonx, yiem Yesu Giduc

Maaih ziepc diuh Ziouv nyei leiz, Tin-Hungh gorngv, yie se Ziouv.
 Oix zuqc Tongx nimc mbuo nyei, dae caux mbuo nyei maa.
 Maiv dungx daix mienh fai hienx, auv hienx nqox fai, zoux zaqc,
 Maiv dungx zoux jaav zornz-zengx caux, mueic jieqv mienh nyei, jaa-dingh.